

萬有文庫

第二集七種

王雲五主編

大方廣佛華嚴經

(十二)

實叉難陀譯

澄觀撰述

商務印書館發行

大方廣佛華嚴經

(十二)

實叉難陀譯

澄觀撰述

國學基本叢書

大方廣佛華嚴經疏鈔會本卷八十九

佛子。菩薩摩訶薩。布施乞者支節諸骨。如法藏菩薩。光明王菩薩。及餘無量諸大菩薩。施其身分支節骨時。見乞者來。生愛樂心。歡喜心。淨信心。安樂心。勇猛心。慈心。無礙心。清淨心。隨所乞求。皆施與心。

疏三十七支節諸骨。前云骨髓。髓已前明。而加支節諸骨。若合者。但是一事。謂支節之骨。若開支節。自是一事。如節支解等。卽前列所無。

菩薩摩訶薩。施身骨時。以諸善根。如是迴向。所謂願一切衆生。得如化身。不復更受骨肉血身。願一切衆生。得金剛身。不可破壞。無能勝者。願一切衆生。得一切智圓滿法身。於無縛無著無繫界生。

疏迴向行中。言無繫界者。卽涅槃界。

願一切衆生。得智力身。諸根圓滿。不斷不壞。願一切衆生。得法力身。智力自在。到於彼岸。願一切衆生。得堅固身。其身真實。常無毀壞。願一切衆生。得隨應身。教化調伏一切衆生。願一切衆生。得智熏身。具毘羅延支節大力。

疏言具毘羅延支節大力者。如涅槃校量。鈔言具毘羅延者。卽涅槃北經第十一。南本第十現病品。因佛現臥。迦葉怪問。如來已離病惱。何故倚臥。便校量佛力云。十小牛力。不如一大牛力。十大牛力。不如一青牛力。十青牛力。不如一凡象力。十凡象力。不如一野象力。次四牙象。次雪山白象。次香山象。次青象。次黃象。次赤象。次白象。次山象。次優鉢羅象。次芬陀利象。次一力士。次鉢健提。次八臂毘羅延。次

十住菩薩一節之力。皆前前之十。不及後後之一。如前六重。故知佛力不可思議。

願一切衆生得堅固相續不斷絕身。永離一切疲極勞倦。願一切衆生得大力安住身。悉能具足精進大力。願一切衆生得徧世間平等法身。住於無量最上智處。願一切衆生得福德力身。見者蒙益遠離衆惡。願一切衆生得無依處身。皆得具足無依著智。願一切衆生得佛攝受身。常爲一切諸佛加護。願一切衆生得普饒益諸衆生身。悉能徧入一切諸道。願一切衆生得普現身。普能照現一切佛法。

疏言普照現身者。如淨明鏡無不現故。餘可知。

願一切衆生得具足精進身。專念勤修大乘智行。願一切衆生得離我慢。高。清淨身。智常安住。無所動亂。願一切衆生得堅固行身。成就大乘一切智業。願一切衆生得佛家身。永離世間一切生死。是爲菩薩摩訶薩。施身骨時善根迴向。

爲令衆生得一切智永清淨故。

疏所爲中言得智者。智爲萬德之骨故。

佛子。菩薩摩訶薩。見有人來手執利刀。乞其身皮。心生歡喜。諸根悅豫。譬如有人。惠以重恩。逢迎引納。敷座令坐。曲躬恭敬。而作是念。此來乞者。甚爲難遇。斯欲滿我一切智願。故來求索。饒益於我。歡喜和顏。而語之言。我今此身一切皆捨。所須皮者。隨意取用。猶如往昔清淨藏菩薩。金脇鹿王菩薩。及除無量諸大菩薩等。無有異。

疏三十八施身皮引例中。清淨藏菩薩。未見同名。智論十六中。如毒龍受一日戒。被剝五色皮。忍而施。

之云云。言金脇鹿王者。智論及菩薩本緣集經第三說金脇鹿救於溺者。彼人背恩。告王取鹿。大例名同。而非施皮。鈔智論者論云。問曰。已知尸羅相。云何波羅蜜。答曰。有人言。菩薩持戒。寧自失身。不毀小戒。是爲尸羅波羅蜜。如上蘇陀摩王經中所說。不惜身命。以全禁戒。如菩薩本身。曾作大力毒龍。若衆生在前。身力弱者。眼視便死。身力強者。氣往而死。是龍曾受一日禁戒。出家求靜。入林樹間。思惟坐久。疲懈而睡。龍法睡時。復形如蛇。身有文綵。七寶雜色。獵者見之。驚喜言曰。此乃希有難得之皮。獻上國王。以爲服飾。不亦宜乎。便以杖按其頭。以刀剝其皮。龍自念言。我力如意。傾覆此國。其如反掌。此人小物。豈能困我。今以持戒故。不計此身。當從佛語。於是自忍。眼目不視。閉氣不息。憐愍此人。爲持戒故。一心受剝。不生悔意。旣以失皮。赤肉在地。時日大熱。蜿轉土中。欲趣大水。見諸小蟲。來食其身。爲持戒故。不復敢動。自思惟言。我今此身。以施諸蟲。爲佛道故。今以肉施。以充其身。後成佛時。當以法施。以益其心。如是誓已。身乾命終。卽生第二忉利天上。爾時毒龍。卽今我身。釋迦佛是。是時獵者。提婆達多等六師是。諸小蟲輩。釋迦佛初轉法輪。八萬諸天得道者。是菩薩護戒。不惜身命。決定不悔。其事如是。名尸羅波羅蜜。釋曰。雖本明戒。正是施皮耳。菩薩本緣經。亦有此緣。其事更廣。先爲大龍。有大勢力。或化身爲人。與諸龍女。共相娛樂。至毘陀山幽邃之處。金翅欲食。欲來諸山碎壞。泉池令其枯涸。諸龍龍女。化爲女人。來附此龍。龍爲金翅說慈心法。令反本宮。後爲諸龍說慈心法。亦令行慈。後捨諍。就靜山間齋戒。多日困乏。暫臥止息。遂遇惡人。餘同上。智論及菩薩本緣經者。經云。菩薩過去墮畜生中。而爲鹿身。兩脇金色。脊似瑠璃。餘處雜廁。種種難名。髀如砮礮。角如金精。其身莊嚴。如七寶藏。身色光燄。如日。

初出諸天敬重。爲立名字。名金色鹿。善解人言。爲諸羣鹿宣說正法。爲大利益。下取意略引。至一河邊。瀑水泛溢。損壞樹岸。見一溺人。投水救之。其人得濟。白鹿王言。君卽是我再生父母。何以報德。鹿王言。我無所須。以身皮妙。常恐人見。當嘿汝言。知恩之人。具多功德。不知恩者。多受苦報。此人背恩。還白王。知王卽命駕。令此溺人。引至鹿所。鹿王正睡。有鳥啄耳。覺已瞻望。見王兵已近。乃安撫羣鹿云。王爲我來。汝勿驚怖。尋至王所。溺者指言。此是鹿王。兩手墜落。王見是事。下馬詣鹿。鹿却慰王。令勿驚怖。我施一切衆生無畏。王遂讚言。汝雖獸身。非實畜也。王語鹿言。旣施一切衆生無畏。爲何令此溺人兩手墜落。鹿王荅言。如人犯官重法。自招其咎。此人自作自受。非我使然。王便長跪。叉手白鹿。我從今日。長相歸依。鹿白王言。若能爾者。願賜此人無畏。如赤子想。此人必墮地獄。故可憐愍。王益稱敬。願長爲弟子。普施諸鹿。令得無畏。敕令國內。不得遊獵。殺害衆生。廣如彼說。更有九色鹿經。事緣一同。但云九色。又王夫人。夜夢託病。王爲求之。許分半國。貪利見王。言知鹿處。當卽面癩。後結會云。鹿卽我身。是王卽父。王夫人卽先陁利。烏卽阿難。溺人卽調達。餘皆同也。釋曰。金色義同。非正捨皮。云大例相似。

菩薩爾時。以諸善根。如是迴向。所謂願一切衆生。得微細皮。猶如如來色相。清淨見者無厭。願一切衆生。得不壞皮。猶如金剛。無能壞者。願一切衆生。得金色皮。如閻浮檀。上妙真金。清淨明潔。願一切衆生。得無量色皮。隨其心樂。現清淨色。願一切衆生。得淨妙色皮。具足沙門善輒。清淨如來色相。願一切衆生。得第一色皮。自性清淨。色相無比。願一切衆生。成就如來清淨色皮。以諸相好。而自莊嚴。願一切衆生。得妙色皮。放大光明。普照一切。願一切衆生。得明網皮。如世高幢。放不可說圓滿光明。願一切衆生。得潤澤色皮。

一切色相。悉皆清淨。

疏願中云。相好皮者。謂金色等。鈔相好者。相謂三十二相中。第十五身皮金色。好者。八十種好中。第十六世尊身皮。潤滑柔軟。光悅鮮淨。塵垢不著。故疏云等。

是爲菩薩摩訶薩。施身皮時。善根迴向。爲令衆生。皆得一切嚴淨佛刹。具足如來大功德故。

疏所爲云。淨佛刹者。皮爲外相故。

佛子。菩薩摩訶薩。以手足指。施諸乞者。如堅精進菩薩。閻浮提自在王菩薩。及餘無量諸大菩薩。菩薩爾時。顏貌和悅。其心安善。無有顛倒。乘於大乘。不求美欲。不尙名聞。但發菩薩廣大之意。遠離慳嫉。一切諸垢。專向如來無上妙法。

疏三十九施手足指。

佛子。菩薩摩訶薩。如是施時。攝諸善根。悉以迴向。

疏回向十願。

願一切衆生。得纖長指。與佛無異。

疏纖長者。量鈔纖長者。直就事說。若約相好。纖長是相。卽三十二中第三相。

願一切衆生。得臚圓指。上下相稱。

疏臚圓者。形鈔臚圓是第二好。

願一切衆生。得赤銅甲指。其甲隆起。清淨鑿徹。

疏亦銅者色。鈔亦銅是第一好。

願一切衆生得一切智勝丈夫指。悉能攝持一切諸法。

疏能攝者力。此以智爲指。鈔能攝者持法界故。亦第五十三好。

願一切衆生得隨好指。具足十力。

疏隨好者妙。言十力者。隨一一指。能持一切世界等。鈔隨好者。總指。由此一句。故別名云爲力爲色

等。亦瑜伽二十指皆殊妙。爲二十隨好也。

願一切衆生得大人指。纖膩齊等。

疏齊等者不參差。鈔齊等者不參差。卽第三隨好云各等無差。

願一切衆生得輪相指。指節圓滿。文相右旋。

疏輪相等者。準梵本云。願一切衆生得十指端。裏面皆有千輻輪相。所餘節中。裏面皆有本那伽吒。及

以塞縛悉底迦相。相間莊嚴。準此則圓滿之言。應云滿餅。右旋之言。應云有樂。若準觀佛三昧海經。一

一指節端。有十二輪相現。鈔輪相等。卽第八十隨好。上說八十世尊。手足及胸臆前。俱有吉祥喜旋

德。和文同綺畫。色類丹珠。裏面皆有本那伽吒者。此云滿餅。塞縛悉底迦。此云有樂。故云圓滿之言。應

言滿餅。右旋之言。應云有樂。其右施梵云難提迦物多。若準等者。卽第一經觀相品。

願一切衆生得如蓮華卍字旋指。十力業報相好莊嚴。

疏八中準梵本。願得大蓮華難提迦物多相指。却是右旋。十力業報者。亦十種大那羅延幢勇健法也。

相卽織等。好卽殊妙。有云萬字旋者。約中文也。準三昧海經。指端各有萬字相。萬字點間。有千輻輪相。願一切衆生。得光藏指。放大光明。照不可說諸佛世界。願一切衆生。得善安布指。善巧分布網縵具足。疏網縵者。經云。斂指不現。張時卽現。如眞珠網。分明可愛。餘可知。是爲菩薩摩訶薩。布施時。善根迴向。爲令衆生一切皆得心清淨故。

疏所爲云。得清淨心者。得指由心故。佛子。菩薩摩訶薩。請求法時。若有人言。汝能施我連肉爪甲。當與汝法。菩薩荅言。但與我法。連肉爪甲。隨意取用。如求法自在。王菩薩。無盡菩薩。及餘無量諸大菩薩。爲求法故。欲以正法。開示演說。饒益衆生。一切皆令得滿足故。捨連肉爪甲。與諸乞者。

菩薩爾時。以此善根如是迴向。所謂願一切衆生。皆得諸佛赤銅相爪。願一切衆生。得潤澤爪。隨好莊嚴。願一切衆生。得光淨爪。鑿徹第一。願一切衆生。得一切智爪。具大人相。願一切衆生。得無比爪。於諸世間。無所染著。願一切衆生。得妙莊嚴爪。光明普照一切世間。願一切衆生。得不壞爪。清淨無缺。願一切衆生。得入一切佛法。方便相爪。廣大智慧。皆悉清淨。願一切衆生。得善生爪。菩薩業果。無不淨妙。願一切衆生。得一切智大導師爪。放無量色妙光明藏。

疏四十施連肉爪中。言赤銅相者。卽是小相。五無比者。事爪則不染塵垢。智爪則不染境相。言善生者。善業生故。有云西域方言。謂善生爲端正。餘可知。鈔赤銅者。卽第一隨好事爪。則不染者。亦第一好。第一好云。一世尊指爪。狹長薄潤。光潔鮮淨。如赤銅色。故具此二。

是爲菩薩摩訶薩。爲求法故。施連肉爪甲時。善根迴向。爲令衆生具足諸佛。一切智爪無礙力故。

疏所以求法偏語施爪者。一則以引例中有現事故。下入火求法。亦準此通。二有所表。以爪能颯取。順求義故。下入火求者。表難取故。故智論云。般若波羅蜜。猶如火聚。四邊不可取。無取亦不取故。鈔般若波羅蜜。猶如火聚。卽龍樹讚般若。至勝熱處。當廣引釋。

佛子。菩薩摩訶薩。求佛法藏。恭敬尊重。生難得想。有能說者。來語之言。若能投身七切火坑。當施汝法。菩薩聞已。歡喜踊躍。作是思惟。我爲法故。尙應久住阿鼻獄等一切惡趣。受無量苦。何況纔入人閒火坑。卽得聞法。奇哉正法。甚爲易得。不受地獄無量楚毒。但入火坑。卽便得聞。但爲我說。我入火坑。如求善法。王菩薩。金剛思惟菩薩。爲求法故。入火坑中。

疏四十一。求法入火者。施行中言七切者。一切七尺也。鈔求法入火者。三地有文。又賢愚經云。又復世尊。過去久遠無量阿僧祇劫。此閻浮提有大國王。名曰梵天王。有太子字曇摩鉗。好樂正法。四方求法。周徧不獲。愁悶懊惱。帝釋化爲婆羅門。來詣王所。王請就座。爲說妙法。婆羅門言。學之甚難。云何使說。太子審問。荅言。若能作大火坑。令深十丈。滿中熾火。自投於中。爲供養者。吾乃與法。太子如教。羣臣諫喻。令愍我等。婆羅門言。吾不相逼。若不爾者。吾不說法。王知意定。令使乘八千里象。宣告一切。太子卽後七日。求法入火。諸小王等。遠近皆集。悲哀勸喻。太子告言。我於久遠生死之中。喪身無數。人中爲貪。更相殘害。天上壽盡。失欲憂苦。地獄之中。火燒湯煮。等受無量苦。未曾爲法。吾今以此臭穢之身。爲法供養。云何止我。將欲投火。先請說法。時婆羅門。爲說偈云。常行於慈心。除去悲害想。大悲愍衆生。於

傷爲兩淚。修行大喜心。同已所得法。救護以道意。乃應菩薩行。聞說法已。便投火坑。帝釋梵王各執一手。而歎之言。一切生類。賴太子安。何爲投火。喪他父母。太子荅言。爲無上道。不惜身命。纔投於火。火變花池。太子安然。坐蓮華臺。諸天雨花。沒至於膝。爾時梵天王者。淨梵王是。

菩薩爾時。以此善根。如是迴向。所謂願一切衆生。住佛所住。一切智法。永不退轉。無上菩提。願一切衆生。離諸險難。受佛安樂。願一切衆生。得無畏心。離諸恐怖。願一切衆生。常樂求法。具足喜樂。衆法莊嚴。願一切衆生。離諸惡趣。滅除一切三毒熾火。願一切衆生。常得安樂具足。如來勝妙樂事。願一切衆生。得菩薩心。永離一切貪恚癡火。願一切衆生。悉得菩薩諸三昧樂。普見諸佛心。大歡喜。願一切衆生。善說正法。於法究竟。常無忘失。願一切衆生。具足菩薩神通妙樂。究竟安住一切種智。

疏迴向行中。初及第九約求法爲願。餘約入火爲願。

是爲菩薩摩訶薩。爲求正法。投火坑時。善根迴向。爲令衆生。離障礙業。皆得具足智慧火故。佛子。菩薩摩訶薩。爲求正法。分別演說。開菩薩道。示菩提路。趣無上智。勤修十力。廣示一切智心。獲無礙智法。令衆生清淨。住菩薩境界。勤修大智。護佛菩提時。以身具受無量苦惱。如求善法菩薩。勇猛王菩薩。及餘無量諸大菩薩。爲求法故。受無量苦。乃至攝取誹謗正法。惡業所覆。魔業所持。極大惡人。彼所應受一切苦惱。以求法故。悉皆爲受。

疏四十二。爲求法護法受衆苦者。如香城粉骨。雪嶺忘軀。其類非一。鈔如香城粉骨等。下句卽涅槃。上句卽大般若。般若文廣。今依大品二十七略引經云。佛告須菩提。菩薩摩訶薩。求般若者。當如薩陀。

波崙。此云常啼。欲求般若。不惜身命。聞空中聲。汝但東行。莫憚勞苦。卽當得聞。菩薩聞已。作是念言。令我東行。何時何處當聞般若。卽住立啼泣。經于七日。空中有佛。卽語之言。從此東行。五百由旬。有城名衆香。彼有菩薩。名曇無竭。此云法尙。日中三時。宣說般若波羅蜜。心念欲往。卽得無量三昧法門。諸佛慰喻。忽然不現。欲見法尙。自念貧無。何以供養。遂欲賣身。中路有城。以魔蔽故。並無人聞賣身之聲。唯有城中長者女。聞帝釋化爲婆羅門云。我不要人。唯要人骨髓。用祀天神。菩薩遂刺左臂出血。割右髀肉。復當破骨出髓。時長者女樓上遙見。下問其故。荅云。我欲供養法尙。求聞般若。女遂止之。許供所須。與共同往。帝釋卽時復天身云。我相試耳。欲求何願。荅云。與我無上菩提。帝釋言是佛境界。非我所能。更何所求。荅云。無所求。帝釋乞令其身如故。菩薩許之。平復如故。釋曰。此卽粉骨。言香城者。彼衆香城。七重。欲往彼故。又至彼城。刺血灑地。故言雪嶺亡軀者。卽涅槃第十四聖行品。明世尊昔在雪山修行。爲求菩提。帝釋化爲羅刹。去其不遠。遂說半偈云。諸行無常。是生滅法。菩薩忽聞。豎髮舉視。遂見羅刹。初疑其人。若聞此偈。不令受此可畏之身。又思或於過去佛所曾聞。尋往問言。汝於何處得是過去離怖畏者所說半偈。半如意珠耶。羅刹言曰。我飢調言。菩薩請言。汝所說者。義味不盡。爲我說終。我當終身爲汝弟子。供給所須。又言我今飢苦。終不能說。菩薩問言。汝須何食。羅刹荅言。我所飲者。唯人熱血。我所食者。唯人暖肉。我飛行處處而不能得。菩薩請言。但爲我說。我聞偈已。以身奉施。羅刹又言。誰當信汝。菩薩荅言。釋提桓因。大梵天王。得他心者。諸佛菩薩。以爲證明。次脫衣服。以敷高座。羅刹坐已。說餘半偈云。生滅滅已。寂滅爲樂。羅刹又言。偈已說竟。當施我身。菩薩是時深思此義。若石若壁。若樹若

道書寫此偈。後昇樹上。投身而下。未至於地。虛空之中。發種種聲。稱歎菩薩。上至阿迦膩吒天。釋復本身。接之安置平地。稱讚善哉。真是菩薩。必成正覺。願見濟度。禮足而去。因此乃超彌勒菩薩十二劫。在先成佛。言其類非一者。如菩薩本緣經說。虔闍那黎王。愛樂正法。廣召賢達。有婆羅門。應詔而至。令王剝身千燈。經停七日。廣集眷屬。遂剝千燈。燈如錢大。添滿油。竟請說偈法。婆羅門說偈言。常者皆盡。高者亦墮。合會有離。生必有死。聞竟然燈。又發願言。願成菩提。然大法燈。照於一切。帝釋問云。得無悔耶。荅言不悔。若不虛者。平復如故。言畢。平復。賢愚經第一。亦有此緣。名虔闍婆黎。又有釘身千道。涅槃十二。亦有賣身重法之緣。恐繁不引。八十經中。普賢自說。求法因緣。第三地中。亦說求法內外無恚。以此善根。如是迴向。所謂願一切衆生。永離一切苦惱。逼迫成就安樂。自在神通。願一切衆生。永離諸苦。得一切樂。願一切衆生。永滅苦蘊。得照現身。恆受安樂。願一切衆生。超出苦獄。成就智行。願一切衆生。得安隱道。離諸惡趣。願一切衆生。得法喜樂。永斷衆苦。願一切衆生。永拔衆苦。互相慈愛。無損害心。願一切衆生。得諸佛樂。離生死苦。願一切衆生。成就清淨。無比安樂。一切苦惱。無能損害。願一切衆生。得一切勝樂。究竟具足。佛無礙樂。

是爲菩薩摩訶薩。爲求法故。受衆苦時。善根迴向。爲欲救護一切衆生。令離險難。住一切智。無所障礙。解脫處故。

佛子。菩薩摩訶薩。處於王位。求正法時。乃至但爲一文一字一句一義。生難得想。能悉罄捨海內所有。若近若遠。國土城邑。人民庫藏。園池屋宅。樹林華果。乃至一切珍奇妙物。宮殿樓閣。妻子眷屬。及以王位。悉

能捨之於不堅中。求堅固法。爲欲利益一切衆生。勤求諸佛。無礙解脫。究竟清淨。一切智道。如大勢德菩薩。勝德王菩薩。及餘無量諸大菩薩。勤求正法。乃至極少。爲於一字。五體投地。正念三世一切佛法。愛樂修習。永不貪著名聞利養。捨諸世間自在王位。求佛自在法王之位。於世間樂心無所著。以出世法長養其心。永離世間一切戲論。住於諸佛無戲論法。

疏四十三求法捨海內所有。卽捨王位所統也。

菩薩爾時以諸善根如是迴向。所謂願一切衆生常樂惠施。一切悉捨。願一切衆生能捨所有。心無中悔。願一切衆生常求正法。不惜身命。資生之具。願一切衆生悉得法利。能斷一切衆生疑惑。願一切衆生得善法欲。心常喜樂。諸佛正法。願一切衆生爲求佛法能捨身命。及以王位大心修習。無上菩提。願一切衆生尊重正法。常深愛樂。不惜身命。願一切衆生護持諸佛甚難得法。常勤修習。願一切衆生皆得諸佛菩提光明。成菩提行。不由他悟。願一切衆生常能觀察一切佛法。拔除疑箭。心得安隱。

疏迴向行中言疑箭者。如涅槃說。人中毒箭。應速拔之。若妄分別未究而終故。

是爲菩薩摩訶薩。爲求正法。捨國城時。善根迴向。爲令衆生知見圓滿。常得住於安隱道故。

佛子。菩薩摩訶薩。作大國王。於法自在。普行教命。令除殺業。閻浮提內。城邑聚落。一切屠殺。皆令禁斷。無足二足。四足多足。種種生類。普施無畏。無欺奪心。廣修一切菩薩諸行。仁慈蒞物。不行侵惱。發妙寶心。安隱衆生。於諸佛所立深志樂。常自安住三種淨戒。亦令衆生如是安住。菩薩摩訶薩。令諸衆生住於五戒。永斷殺業。

疏四十四爲王斷殺等施行中。自住三聚淨戒。令他住於五戒。是爲法施。五戒殺初。故此偏語。若望所殺。是無畏施。

以此善根如是迴向。所謂願一切衆生發菩薩心。具足智慧。永保壽命。無有終盡。願一切衆生住無量劫。供一切佛恭敬勤修。更增壽命。願一切衆生具足修行。離老死法。一切災毒。不害其命。願一切衆生具足成就無病惱身。壽命自在能隨意住。願一切衆生得無盡命。窮未來劫住菩薩行。教化調伏一切衆生。願一切衆生爲壽命門。十力善根於中增長。願一切衆生善根具足。得無盡命。成滿大願。願一切衆生悉見諸佛。供養承事。住無盡壽。修習善根。願一切衆生於如來處善學所學。得聖法喜。無盡壽命。願一切衆生得不老不病常住命根。勇猛精進。入佛智慧。

是爲菩薩摩訶薩住三聚淨戒。永斷殺業。善根迴向。爲令衆生得佛十力圓滿智故。

佛子。菩薩摩訶薩見有衆生心懷殘忍。損諸人畜。所有男形。令身缺減。受諸楚毒。見是事已。起大慈悲。而哀救之。令閻浮提一切人民皆捨此業。

疏四十五救於形殘。初施行中。具足三施。於中三。初覩境興悲。

菩薩爾時語其人言。汝何所爲。作是惡業。我有庫藏。百千萬億。一切樂具。悉皆充滿。隨汝所須。盡當相給。汝之所作。衆罪由生。我今勸汝。莫作是事。汝所作業。不如道理。設有所獲。於何可用。損他益己。終無是處。如此惡行。諸不善法。一切如來所不稱歎。

疏次菩薩爾時下。以法諫喻。

作是語已。卽以所有一切樂具。盡皆施與。復以善語。爲說妙法。令其歡悅。所謂示寂靜法。令其信受。滅除不善。修行淨業。互起慈心。不相損害。彼人聞已。永捨罪惡。

疏後作是語下。財法雙救。財救所害之現苦。法救能害之當苦。示寂靜滅。修淨業道。滅集因。故俱舍論說。昔有黃門救五百牛。毀形之事。善根力故。男形具足。鈔俱舍論說等者。與西域記第一全同。彼云。是屈支國舊曰龜茲國。城西門外路之左右。各立佛像。高九十餘尺。五年修設一大會。西北渡河至阿奢里。武伽藍。唐言奇特。相傳云。昔此國先王崇敬三寶。將欲遊方。觀禮聖跡。乃命母弟。攝知留事。其弟受命竊自割勢。防未萌也。封之金函。持以上王。王曰。斯何謂也。對曰。駕迴之日。乃可開發。卽付執事。隨軍掌護。王之還也。果有構禍者。白王。王命監國。姪亂中宮。王聞震怒。欲置嚴刑。弟曰。不敢逃責。願開金函。王遂發而觀之。乃斷勢也。曰。斯何異物。欲何發明。對曰。王昔遊方。命知留事。懼有譏禍。割勢自明。今果有徵。願垂照鑒。王深敬異。情愛彌隆。出人後庭。無所禁礙。王弟於後行。遇一夫。擁一百牛。欲視刑腐。見而懷念。引類增懷。我今形虧。豈非宿業。卽以財寶。贖此羣牛。以慈善力。男形漸具。以形具故。遂不入宮。王怪而問之。乃陳其始末。王以爲奇特也。遂建伽藍。式旌美迹。傳芳後葉。從此立名。

菩薩爾時。以此善根。如是迴向。所謂願一切衆生。具丈夫形。成就如來馬陰藏相。願一切衆生。具男子形。發勇猛心。修諸梵行。願一切衆生。具勇猛力。恆爲主導。住無礙智。永不退轉。願一切衆生。皆得具足大丈夫身。永離欲心。無有染著。願一切衆生。悉得成就善男子法。智慧增長。諸佛所歎。願一切衆生。普得具於大人之力。常能修習十力善根。願一切衆生。永不失壞男子之形。常修福智。未曾有法。願一切衆生。於五

欲中無著無縛。心得解脫。厭離三有。住菩薩行。願一切衆生。成就第一智慧丈夫。一切宗信。伏從其化。願一切衆生。具足菩薩丈夫智慧。不久當成無上大雄。

疏二回向行中。修諸梵行。未必制心。後離欲心。必無身過。具男子形。但異女身。具大丈夫。必心懷道德。是爲菩薩摩訶薩。禁絕一切毀敗男形。善根迴向。爲令衆生具丈夫形。皆能守護諸善丈夫。生賢聖家。智慧具足。常勤修習。丈夫勝行。有丈夫用。巧能顯示。七丈夫道。具足諸佛善丈夫種。丈夫正教。丈夫勇猛。丈夫精進。丈夫智慧。丈夫清淨。普令衆生究竟皆得。

疏四所爲中。初令得果。後常勤下。令得起行。丈夫行者。涅槃十八云。一切男女若具四法。卽名丈夫。一近善知識。二聽聞正法。三思惟其義。四如說修行。又四相品。具四相故。名爲丈夫。鈔四如說修行者。此下餘經云。善男子。若男若女。具足四法。謂名丈夫。若有男子。無此四法。卽不得名爲丈夫也。何以故。身雖丈夫。行同畜生。如來調伏。若男若女。是故佛號調御丈夫也。又四相品。卽南經北經。卽如來性品。卷當第四。言四相者。一者自正。二者正他。三者能隨問答。四者善解因緣義。前亦已引。意云自正者。明信三寶。常住不移。寧以利刀。割斷其舌。終不說言如來法僧。是無常也。二正他者。意云隨機授法。智小未堪。說無常等。智大堪化。乃可具說常無常等。三能隨問答者。意云善知如來制聽之意。隨問而說。如有問言。云何不施一錢。得大施名。佛言。不食酒肉。施以酒肉。不飾香花。施以香花。無費一毫。施名流布。迦葉因言。食肉之人。不應受施。便爲廣說斷肉之制。昔開三種。乃爲漸損其貪耳。四善解因緣義者。意云知佛有何因緣。初不說深。不廣制戒。後方說之。知未堪聞。故先未說。未有過失。故不廣制。隨過補之。

然此四相。將爲衆生開大涅槃。爲能開德。通是利他。若別說者。初一自利。自行非邪。故名爲正。後三利他。令離邪過。故名正他。此一正是利他行體。後二化德。能隨問答。明知法藥自在。隨問巧答。四達根性。善知隨機授化。因緣上就能開以說。若就所開四者。經云復次自正者。所謂得是大般涅槃。正他者。我爲比丘說言。如來常存不變。隨問答者。迦葉因汝問故。得廣爲菩薩摩訶薩。比丘比丘尼。優婆塞。優婆夷。說是甚深微妙義理。因緣義者。聲聞緣覺。不解如是甚深之義。不聞伊字三點。而成解脫涅槃。摩訶般若。成祕密藏。我今於此闡揚分別。爲諸聲聞開發慧眼等。餘廣如彼經。此中但取其四事名丈夫耳。

疏又云。雖是女人。能信自身有佛性者。卽是丈夫故。男子不信。卽是女人。顯示七丈夫道。卽丈夫用道。字梵本名爲揭底。此云事業。晉本云丈夫趣。與道相近。然七丈夫。總有多說。一約世閒。喻伽丈夫有其七義。一長壽久住。二妙色端嚴。三無病少惱。四非僕非女。非半擇迦。五智慧猛利。六發言威肅。七有大宗葉。具此七法。名爲丈夫道。卽是彼之因也。卽下所列六句。小有開合。可以思準。前令具丈夫形。卽非女等也。二依小乘。有七丈夫。卽七賢聖。一隨信行。二隨法行。三信解。四見至。五身證。六慧解脫。七俱解脫。離世閒品當說。此應不願成彼小乘。三依大乘。瑜伽七地。卽七賢聖。如十住品初說。四依瓔絡六位及信。卽上生賢聖家。復有說言。卽七善知。謂知法。知義。知時。知足。知自。知衆。知尊卑故。佛丈夫種。所謂大悲。成十力等。爲佛丈夫。丈夫正教。卽內三藏。及外五明。餘文易了。鈔雖是女人下。卽涅槃經第九經末。前廣說女人之過竟。便云善男子。以是義故。諸善男子善女人等。聽是大乘般涅槃經。常應訶責。

女人之相。求於男子。何以故。是大乘經典。有丈夫相。所謂佛性。若人不知是佛性者。我說是等名爲女人。若能自知有佛性者。我說是人爲丈夫相。若有女人能知自身定有佛性。當知是等卽是男子。釋曰。此文證宗五性者。都非丈夫。若具四德。不揀男女。卽丈夫矣。然七丈夫者。疏出其五。一依瑜伽七丈夫。卽八異熟中。除財位果。以屬外故。八異熟義。卽當瑜伽第三十六。此回向初。已具引竟。淨行品中。亦已略出。二依小乘者。如俱舍賢聖品。離世間亦出。七善知如梵行品引。

大方廣佛華嚴經疏鈔會本卷九十

十迴向品第二十五之六。

佛子。菩薩摩訶薩。若見如來出興於世。開演正法。

疏四十六歎佛出世。如上大威光童子偈聲普告等。初施行者。卽法施行。於中三一見佛興世。二以大下法施益生。三爾時下結所成益。

以大音聲普告一切。如來出世。如來出世。令諸衆生得聞佛名。捨離一切我慢戲論。復更勸導。令速見佛。令憶念佛。令歸向佛。令攀緣佛。令觀察佛。令讚歎佛。復爲廣說佛難值遇。千萬億劫。時乃一出。衆生由此得見於佛。生清淨信。踊躍歡喜。尊重供養。復於佛所聞諸佛名。轉更值無數諸佛。植諸善本。修習增長。疏二中四。初令聞名離惑益。二復更下見身起行益。三復爲下讚希增敬益。四復於下展轉增長益。爾時無數百千萬億那由他衆生。因見佛故。皆得清淨。究竟調伏。彼諸衆生。於菩薩所。皆生最上善知識。想。因菩薩故。成就佛法。以無數劫。所種善根。普於世閒施作佛事。

疏三結益可知。

佛子。菩薩摩訶薩。開示衆生。令見佛時。以諸善根。如是迴向。所謂願一切衆生。不待勸誘。自往見佛。承事供養。皆令歡喜。願一切衆生。常樂見佛。心無廢捨。願一切衆生。常勤修習。廣大智慧。受持一切諸佛法藏。願一切衆生。隨所聞聲。皆悟佛法。於無量劫。修菩薩行。願一切衆生。安住正念。恆以智眼。見佛出興。願一

切衆生。不念異業。常憶見佛。勤修十力。願一切衆生。於一切處。常見諸佛。了達如來。徧虛空界。願一切衆生。皆得具足。佛自在身。普於十方。成道說法。願一切衆生。遇善知識。常聞佛法。於諸如來。得不壞信。願一切衆生。悉能稱歎諸佛。出興令其見者。普得清淨。

疏二迴向可知。

是爲菩薩摩訶薩。歎佛出世善根迴向。爲令衆生見一切佛。供養承事。於無上法。究竟清淨故。佛子。菩薩摩訶薩。捨於大地。或施諸佛。造立精舍。或施菩薩。及善知識。隨意所用。或施衆僧。以爲住處。或施父母。或施別人。聲聞獨覺。種種福田。乃至一切貧窮孤露。及餘四衆。隨意悉與。令無所乏。或施造立如來塔廟。於如是等諸處之中。悉爲辦具資生什物。令隨意用。無所恐懼。

疏四十七施大地中。但通相言也。初施行中。略列諸田。實通一切。言別人者。謂有資財人。非敬非悲故。菩薩通於一切。善知識要在益我。鈔言別人者。卽不思議境界經。普賢云。又復菩薩。爲護三昧。隨法施時。不揀福田。怨親善惡。持戒破戒。富貴貧賤。又復思惟。施於富者。雖無所用。然我自應修習。施行釋曰。卽有財爲別人也。

疏於中佛塔菩薩知識父母。是恩田。亦敬田。衆僧二乘。是德田。亦敬田。貧孤是悲田。亦苦田。此等皆能生福。如世之田。鈔於中佛塔下。第二料揀諸田有四。一總立五田。謂恩敬德悲苦。

疏若敬田有病。卽亦敬亦悲。乃成四句。故智論十四云。一憐愍施。謂於貧窮下賤及畜生。二恭敬施。謂於佛及法身菩薩等。三憐愍恭敬施。謂於老病貧窮。阿羅漢辟支佛等。鈔二若敬田下。辨其兼通言。

智論十四者。論云復次三事。因緣生檀。一者信心清淨。二者財物。三者福田。心有三種。若憐愍。若恭敬。若憐愍。恭敬。施貧窮下賤。及諸畜生。是憐愍施。佛及諸法身菩薩。是爲恭敬施。若施諸老病貧窮。阿羅漢。辟支佛。是爲恭敬憐愍施。釋曰。論唯此三句。今有非恭敬。非憐愍。卽上別人。疏總收爲二。謂悲與敬。其非敬非悲。亦悲田攝。無德可恭敬故。鈔三總收爲二者。謂悲田攝苦敬田攝恩德。

疏然此二田。以理御心。則等無優劣。故淨名云。最下乞人。猶如如來。福田無異。無所分別。等於大悲。若直就境論。則敬強悲劣。以恩深德厚故。如投量功德經說。若就於心。卽悲田爲勝。親引悲故。故敬則田強而悲心弱。悲則田弱而悲心強。各有其美。俱爲良田。若等是敬田。恩則勝德。故投量經云。供百羅漢。不及一生身父母。阿含中說。供養父母。共一生補處功德。齊等。若同是恩田。在家人則父母恩勝。出家則師僧恩勝。如舍利弗請問經說。或約生色身。及生法身。則優劣可知矣。等是德田。別不如普。故梵網經說。別請五百羅漢菩薩僧。不如僧次一凡夫僧。又由主財田異。感報勝劣。種種不同。恐繁不載。鈔然此二田下。四彰其優劣。一約智。二約境。三約悲。初融心境。故云以理御心。今初成上。以理御心。則心境無二。況就於境。而有分別。卽淨名第一善德長者子章中。長者子自於父舍。設大施會。供養一切沙門婆羅門。及諸外道。貧窮下賤。孤獨乞人。期滿七日。時維摩詰人會。訶云。當爲法施之會。何用是財施會爲。問曰。何謂法施之會。答云。法施會者。無前無後。一時供養一切衆生。是名法施之會。後廣爲說法。施長者子發心。解身瓔珞。價直百千。上之不肯取。再請受之。分作二分。一分施此會中最下乞人。一分

奉彼難勝如來。一切衆會。皆見光明國土難勝如來。又見瓔珞在彼佛上。變成四柱寶臺。四面嚴飾。分明。不相鄣蔽。時維摩詰。現神變已。復作是言。若施主等心施。一最下乞人。猶如如來福田之相。無所分別。等於大悲。不求果報。是則名爲具足法施。釋曰。旣云無所分別。卽以理御心。等于大悲。亦同體悲矣。又云施主等心施。明以理御心也。若直就下。第二約境敬勝。言校量功德。經者。經云。施畜生得百倍福。施外道得千倍福等。前已引竟。又甚稀有。經云。以七寶等。供滿四洲四果聖人。及滅度後。廣起塔廟。不如造麩麥等佛塔功德。乃至算數譬喻。非比。釋曰。此卽四果尙不及佛。明敬田勝也。若就於心下。第三約悲心說。然探玄記。引像法決疑經中。乃至施佛菩薩聲聞衆生。不如有人施畜生一口飯食等。此是僞經。故疏不引。但取親引於悲。悲是菩薩根故。悲爲菩薩體故。若無大悲。非菩薩故。淨名亦云。等於大悲故。故敬則田強下。卽羅什法師釋淨名等於大悲之言。而叡公不許。但以心等故。等卽前第一義耳。今取雙成後二。故云各有其美。若等是敬田下。第二但就敬中。以論優劣。以恩德田。皆敬田故。於中三一敬恩分別。若同是恩下。二恩中道俗分別。如舍利弗請問經者。經唯一卷。問云。何故如來說父母恩大不可報。又言師僧之恩不可量。其誰爲最。佛言。夫在家者。孝事父母。在於膝下。莫以報生長育養等。以生育恩深。故言大也。若從師學。開發知見。此恩大也。夫出家者。捨其父母。生死之家。入法門中。受微妙法。是師之力也。生長法身。出功德財。養智慧命。功莫大也。追其所生。乃次之耳。釋曰。若據經意。前疏順前意。各自爲重。以二相望。則出家爲勝。故言或約生色身等。則優劣可知。卽順經後意也。三等是德田下。就德田中。普別分別。引梵網經。卽菩薩戒云。若佛子。有出家菩薩。在家菩薩。及一切檀越。請僧福

田。求願之時。應人僧坊問知事人。今欲次第請者。卽得十方賢聖之僧。而世人別請五百羅漢及菩薩僧。不如僧次一凡夫僧。若別請者。是外道法。七佛無別請法。不順孝道。若故別請者。犯輕垢罪。又由主財田等者。俱舍論云。由主財田異。故施果差別。此卽約分別門。就於三輪。皆具優劣。主謂重心。輕心等。財謂好物惡物等。田謂若敬若悲等。

疏然今此中菩薩施心。悲智齊於虛空。事物窮乎法界。施田凡聖盡於十方。故三事性空深無底。三事殊特勝無比。三事廣大徧無涯。三事相融俱無礙。鈔然今此中下第三結示經旨。三事卽三輪。廣卽約事。深卽約理。融有二義。一融於上事理。二以理融事。重重無盡。

菩薩摩訶薩。隨何方所布施地時。以諸善根如是迴向。所謂願一切衆生。具足清淨一切智地。悉到普賢衆行彼岸。願一切衆生。得總持地。正念受持一切佛法。願一切衆生。得住持力。常能守護一切佛教。願一切衆生。得如地心。於諸衆生意常清淨。無有惡念。願一切衆生。持諸佛種。成就菩薩諸地次第。無有斷絕。願一切衆生。普爲一切作安隱處。悉令調伏住清淨道。願一切衆生。同諸如來利益世間。普使勤修安住佛力。願一切衆生。普爲世間之所愛樂。悉令安住無上佛樂。願一切衆生。獲善方便。住佛諸力無畏法中。願一切衆生。得如地智自在修行一切佛法。

疏二迴向行中。初一果地。餘九因地。各相似義。如理應思。

是爲菩薩摩訶薩。施大地時。善根迴向。爲令衆生皆得究竟一切如來清淨地故。佛子。菩薩摩訶薩。布施僮僕。供養一切諸佛菩薩。眞善知識。或施僧寶。或奉父母尊勝福田。或復給施病

苦衆生。令無闕乏。以存其命。或復施與貧窮孤露。及餘一切無瞻侍者。或爲守護。如來塔廟。或爲書持諸佛正法。以千百億那由他。僕使隨時給施。其諸僕使。皆聰慧善巧。性自調順。常勤精進。無有懈惰。具質直心。安樂心。利益心。仁慈心。恭恪心。無怨恨心。無讐敵心。能隨受者。方俗所宜。於彼彼中。作諸利益。又皆從菩薩淨業所感。才能技藝。工巧算數。靡不通達。善能供侍。悅可其心。

疏四十八施僮僕。少美曰僮。以擬瞻侍。執守曰僕。以備勞役。然不放之從良。而施與人。還令成僕者。以菩薩行海。無善不修。若唯放從良。有三義闕。一行海不具。二彼僕本願不滿。三佛果闕。此應機之德。除可知。

菩薩爾時。以諸善根如是迴向。所謂願一切衆生。得調順心。一切佛所。修習善根。願一切衆生。隨順供養。一切諸佛。於佛所說。悉能聽受。願一切衆生。得佛攝受。常觀如來。更無餘念。願一切衆生。不壞佛種。勤修一切順佛善根。願一切衆生。常勤供養。一切諸佛。無空過時。願一切衆生。攝持一切諸佛妙義。言詞清淨。遊行無畏。願一切衆生。常樂見佛。心無厭足。於諸佛所。不惜身命。願一切衆生。得見諸佛。心無染著。離世所依。願一切衆生。但歸於佛。永離一切邪歸依處。願一切衆生。隨順佛道。心常樂觀。無上佛法。是爲菩薩摩訶薩。施僕使時。善根迴向。爲令衆生。遠離塵垢。淨治佛地。能現如來自在身故。

佛子。菩薩摩訶薩。以身布施諸來乞者。布施之時。生謙下心。生如地心。生忍受衆苦。無變動心。生給侍衆生。不疲厭心。生於諸衆生。猶如慈母。所有衆善。悉迴與心。生於諸愚險極惡衆生。種種侵陵。皆寬宥心。安住善根。精勤給事。

疏四十九施自身爲給侍。

菩薩爾時。悉以善根。如是迴向。所謂願一切衆生。隨其所須。常無闕乏。修菩薩行。恆不間斷。不捨一切善。薩義利。善住菩薩所行之道。了達菩薩平等法性。得在如來種族之數。住真實語。持菩薩行。令諸世間。得淨佛法。深心信解。證法究竟。令諸衆生。出生清淨。增上善根。住大功德。具一切智。又以此善根。令一切衆生。常得供養一切諸佛。解一切法。受持讀誦。不忘不失。不壞不散。心善調伏。不調令調。以寂靜法。而調習之。令彼衆生。於諸佛所。住如是事。又以此善根。令一切衆生。作第一塔。應受世間種種供養。令一切衆生。成最上福田。得佛智慧。開悟一切。令一切衆生。作最上受者。普能饒益一切衆生。令一切衆生。成最上福利。能使其足一切善根。令一切衆生。成第一好處。能使獲得無量福報。令一切衆生。於三界中。皆得出離。令一切衆生。作第一導師。能爲世間。示如實道。令一切衆生。得妙總持。具持一切諸佛正法。令一切衆生。證得無量第一法界。具足虛空無礙正道。

疏二迴向行中有二十願。前十進善。後十住持。

是爲菩薩摩訶薩。施自己身善根。迴向爲令衆生。皆得應供無量智身故。

佛子。菩薩摩訶薩。聞法喜悅。生淨信心。能以其身。供養諸佛。欣樂信解。無上法寶。於諸佛所。生父母想。讀誦受持無礙道法。普入無數那由他法。大智慧寶。諸善根門。心常憶念無量諸佛。入佛境界。深遠義理。能以如來微密梵音。興佛法雲。雨佛法雨。勇猛自在。能分別說一切智人第一之地。具足成就薩婆若乘。以無量百千億那由他大法。成滿諸根。佛子。菩薩摩訶薩。於諸佛所。聞如是法。歡喜無量。安住正法。自斷疑

惑亦令他斷。心恆怡暢。功德成滿。善根具足。意恆相續。利益衆生。心常不匱。護最勝智。成金剛藏。親近諸佛。淨諸佛刹。常勤供養一切如來。

疏五十聞法喜悅。捨身供佛。初施行者。卽財法二供。文中三。初標行體。二欣樂下。別顯行相。初自利行。後能以如下利他行。三佛子下。結行成益。

菩薩爾時。以諸善根。如是迴向。所謂願一切衆生。皆得圓滿最勝之身。一切諸佛之所攝受。願一切衆生。常近諸佛。依諸佛住。恆得觀仰。未曾遠離。願一切衆生。皆得清淨不壞之身。具足一切功德智慧。願一切衆生。常勤供養一切諸佛。行無所得。究竟梵行。願一切衆生。得無我身。離我我所。願一切衆生。悉能分身。徧十方刹。猶如影現。而無來往。願一切衆生。得自在身。普往十方。無我無受。願一切衆生。從佛身生。處在如來無上身家。願一切衆生。得法力身。忍辱大力。無能壞者。願一切衆生。得無比身。成就如來清淨法身。願一切衆生。成就出世功德之身。生無所得。清淨法界。

是爲菩薩摩訶薩。以身供佛善根迴向。爲令衆生永住三世諸佛家故。佛子。菩薩摩訶薩。以身布施一切衆生。爲欲普令成就善根。憶念善根。

疏五十一以身普施一切衆生。施行中亦具事法二施。初總標。

菩薩摩訶薩。自願其身。爲大明燈。普能照耀一切衆生。爲衆樂具。普能攝受一切衆生。爲妙法藏。普能任持一切衆生。爲淨光明。普能開曉一切衆生。爲世光影。普令衆生常得觀見。爲善根因緣。普令衆生常得值遇。爲真善知識。令一切衆生。悉蒙教誘。爲平坦道。令一切衆生。皆得履踐。爲無有上。具足安樂。令一切

衆生離苦清淨。爲明淨日。普作世間平等利益。

疏後菩薩下別顯。若約事。則身爲日月光明。河池井泉。以施於物。以三種世間身得自在故。若約法施。則法燈照耀。法日利益等。文中或法或事。而義實兩兼。

菩薩爾時。以諸善根。如是迴向。所謂願一切衆生。常親近佛。入佛智地。願一切衆生。得隨順智。住無上覺。願一切衆生。常處佛會。意善調伏。願一切衆生。所行有則。具佛威儀。願一切衆生。悉得涅槃。深解法義。願一切衆生。具知足行。生如來家。願一切衆生。捨無明欲。住佛志樂。願一切衆生。生勝善根。坐菩提樹。願一切衆生。殺煩惱賊。離怨害心。願一切衆生。具足護持一切佛法。

疏二迴向行中。上之施行。以身就生等。翻願衆生。以身近佛等。隨義思之。

是爲菩薩摩訶薩。以身布施一切衆生善根迴向。爲欲利益一切衆生。令得無上安隱處故。佛子。菩薩摩訶薩。自以其身給侍諸佛。於諸佛所。念報重恩。如父母想。於諸如來。起深信樂。以清淨心。護佛菩提。住諸佛法。離世閒想。生如來家。隨順諸佛。離魔境界。了達一切諸佛所行。成就一切諸佛法器。

疏五十二施身給侍諸佛。初施行亦有身侍心侍。

菩薩爾時。以此善根。如是迴向。所謂願一切衆生。得清淨心。一切智寶。而自莊嚴。願一切衆生。住善調伏。遠離一切諸不善業。願一切衆生。得不可壞堅固眷屬。普能攝受諸佛正法。願一切衆生。爲佛弟子。到於菩薩灌頂之地。願一切衆生。常爲諸佛之所攝受。永離一切不善之法。願一切衆生。隨順諸佛。修行菩薩最勝之法。願一切衆生。入佛境界。悉皆得授一切智記。願一切衆生。與諸如來皆悉平等。一切佛法無不

自在。願一切衆生。悉爲諸佛之所攝受。常能修行無取著業。願一切衆生。常爲諸佛第一侍者。一切佛所修智慧行。

疏二迴向行。亦依二侍立願。

是爲菩薩摩訶薩。給侍諸佛善根迴向。爲欲證得諸佛菩提。爲欲救護一切衆生。爲欲出離一切三界。爲欲成就無煩惱心。爲得無量廣大菩提。爲欲成就照佛法智。爲欲常蒙諸佛攝受。爲得諸佛之所護持。爲欲信解一切佛法。爲欲成就與三世佛平等善根。爲欲圓滿無悔恨心。證得一切諸佛法故。

佛子。菩薩摩訶薩。布施國土一切諸物。乃至王位。悉亦能捨。

疏五十三施國所有。乃至王位。初施行中。先明事捨。

於諸世事。心得自在。無繫無縛。無所戀著。遠離惡業。饒益衆生。不著業果。不樂世法。不復貪染諸有生處。雖住世間。非此處生心。不執著。蘊界處法。於內外法心無依住。常不忘失諸菩薩行。未曾遠離諸善知識。持諸菩薩廣大行願。常樂承事一切善友。

疏後於諸下。明其心捨自在是總。下十句別。現棄萬乘。猶如脫屣。何繫縛哉。餘義見十藏品。

菩薩爾時。以此善根。如是迴向。所謂願一切衆生。爲大法王。於法自在。到於彼岸。願一切衆生。成佛法王。摧滅一切煩惱怨賊。願一切衆生。住佛王位。得如來智。開演佛法。願一切衆生。住佛境界。能轉無上自在法輪。願一切衆生。生如來家。於法自在。護持佛種。永使不絕。願一切衆生。開示無量法王正法。成就無邊諸大菩薩。願一切衆生。住淨法界。爲大法王。現佛出興。相繼不斷。願一切衆生。於諸世界作智慧王。化導

羣生無時暫捨。願一切衆生。普爲法界虛空界等諸世界中一切衆生作法施主。使其咸得住於大乘。願一切衆生。得成具足衆善之王。與三世佛善根齊等。是爲菩薩摩訶薩。布施王位善根迴向。爲欲令彼一切衆生。究竟住於安隱處故。

佛子。菩薩摩訶薩。見有人來乞王京都。嚴麗大城。及以關防。所有輸稅。盡皆施與。心無吝惜。專向善提。發大誓願。

疏五十四施王都城可知。

住於大慈。行於大悲。志意歡悅。利益衆生。以廣大智解了深法。安住諸佛平等法性。發心爲求一切智故。於自在法。起深樂故。於自在智。求證得故。淨修一切諸功德故。住於堅固廣大智故。廣集一切諸善根故。修行一切佛法願故。自然覺悟大智法故。安住善提心無退故。修習一切菩薩行。願一切種智。盡究竟故。而行布施。以此善根。如是迴向。所謂願一切衆生。悉能嚴淨無量利土。奉施諸佛。以爲住處。願一切衆生。常樂居止阿蘭若處。寂靜不動。願一切衆生。永不依止王都聚落。心樂寂靜。永得究竟。願一切衆生。永不樂著一切世間。於世語言常樂遠離。願一切衆生。得離貪心。施諸所有。心無中悔。願一切衆生。得出離心。捨諸家業。願一切衆生。得無吝心。常行惠施。願一切衆生。得不著心。離居家法。願一切衆生。得離衆苦。除滅一切災橫怖畏。願一切衆生。嚴淨十方一切世界。奉施諸佛。是爲菩薩摩訶薩。布施王都善根迴向。爲令衆生。悉能嚴淨諸佛刹故。

佛子。菩薩摩訶薩。所有一切內宮眷屬。妓侍衆女。皆顏貌端正。才能具足。談笑歌舞。悉皆巧妙。種種衣服。

種種華香。而以嚴身。見者歡喜。情無厭足。如是寶女。百千萬億。由他數。皆由菩薩善業所生。隨意自在。敬順無失。盡以布施諸來乞者。而於其中。無愛樂心。無顧戀心。無耽著心。無繫縛心。無執取心。無貪染心。無分別心。無隨逐心。無取相心。無樂欲心。

疏五十五施內宮眷屬。初施行中。二一女麗具德。二而於下明施心清淨。

菩薩爾時觀諸善根。爲欲令一切衆生咸得出離。故迴向。得佛法喜。故迴向。於不堅固中。而得堅固。故迴向。得金剛智。不可壞心。故迴向。入佛道場。故迴向。到於彼岸。故迴向。得無上菩提心。故迴向。能以智慧了達諸法。故迴向。出生一切善根。故迴向。入三世諸佛家。故迴向。

疏二菩薩爾時下。明迴向行文。分爲二。初迴向意。二正顯迴向。今初以歷事將終。文勢稍展。此一段文。貫於前後。然晉經迴向二字。皆在句初。則是迴向菩提意也。今經在於句末。則是迴向之意。然迴向意。與迴向所爲。大同小異。小異云何。謂有此意。故所以迴向。今迴向者。爲成此故。又意則多通諸行。所爲別約施行。言大同者。意爲此故。就文又二。初二正顯迴向之意。文有十句。

佛子。菩薩摩訶薩。住如是法。生如來家。增長諸佛清淨勝因。出生最勝一切智道。深入菩薩廣大智業。滅除一切世間垢惱。常能供施功德福田。爲諸衆生宣說妙法。善巧安立。令其修習諸清淨行。常勤攝取一切善根。

疏後佛子下。重牒前意。欲將迴向。初句總指上意。故云住如是法。生如來家。下從後倒牒。亦有十句。一牒入佛家。二勝因。卽出世善。次五可知。八善巧者。謂不堅易堅。九修習者。是得法喜。十常攝善根。爲令

出離西域文勢義多如此。反騰前辭。鈔義多如此者。卽五失本中之一。如初會說。

菩薩爾時以諸善根如是迴向。所謂願一切衆生。常得無量三昧眷屬。菩薩勝定相續不斷。願一切衆生。常樂見佛。悉入諸佛莊嚴三昧。願一切衆生。成就菩薩不思議定。自在遊戲。無量神通。願一切衆生。入如實定。得不壞心。願一切衆生。盡獲菩薩甚深三昧。於諸禪定而得自在。願一切衆生。得解脫心。成就一切三昧眷屬。願一切衆生。種種三昧。皆得善巧。悉能攝取諸三昧相。願一切衆生。得勝智三昧。普能學習諸三昧門。願一切衆生。得無礙三昧。入深禪定。終不退失。願一切衆生。得無著三昧。心恆正受。不取二法。疏二菩薩爾時下。正明迴向。文有十願。隨一一願。具前十意。十願皆云三昧者。禪定輕安。身心柔軟。猶彼女故。故善財偈云。定女常供侍。

是爲菩薩摩訶薩。布施一切內宮眷屬時。善根迴向。爲欲令一切衆生。皆得不壞清淨眷屬故。爲欲令一切衆生。皆得菩薩眷屬故。爲欲令一切衆生。悉得滿足佛法故。爲欲令一切衆生。滿足一切智力故。爲欲令一切衆生。證於無上智慧故。爲欲令一切衆生。得於隨順眷屬故。爲欲令一切衆生。得同志行人共居故。爲欲令一切衆生。具足一切福智故。爲欲令一切衆生。成就清淨善根故。爲欲令一切衆生。得善和眷屬故。爲欲令一切衆生。成就如來清淨法身故。爲欲令一切衆生。成就次第如理辯才。善說諸佛無盡法藏故。爲欲令一切衆生。永捨一切世俗善根。同修出世清淨善根故。爲欲令一切衆生。淨業圓滿。成就一切清淨法故。爲欲令一切衆生。一切佛法皆悉現前。以法光明。普嚴淨故。

疏三結四所爲。並可知。

佛子。菩薩摩訶薩。能以所愛妻子布施。猶如往昔須達拏太子。現莊嚴王菩薩。及餘無量諸菩薩等。

疏五十六施妻子。二事合願。初施行中。二先標章引例。須達拏者。此云善愛。或云好愛。事如彼經。現莊嚴王。如大莊嚴經說。又如菩薩本緣經說。一切持王子施二子等。鈔須達拏者。此云善愛。或云好愛。經唯一卷。說事甚廣。今當略引。阿難請問佛說過去不可說劫。有一大國。名爲葉波。王號溼波。無子禱神。後乃有子。內外歡喜。號須大拏。年十五六。無藝不通。納妃名曼垣。生一男一女。太子廣行惠施。施王敵國。行蓮花白象。與其怨國大臣。瞋懼白王。擯太子於檀特山。太子出門。一切皆施。無揀車馬。亦爲他乞。太子負男。其妃抱女。至其山所。山有道人。名阿蘭陁。太子遂問道人云。何可居止。荅云。山是福地。無處不可。乃造草庵而居。有拘留國十二醜婆羅門。年四十方娶妻。妻令求奴婢。聞太子好施。去山六千里。而來求乞。初遇獵師欲殺之。云王遣迎太子。獵遂放之。見太子乞子。太子自縛以施之。其母不在。母目觸動。左手復痒。恐太子不安。遽歸。三問太子。不應。復問。方荅云。我以施訖。其妻悶絕。良久乃蘇。放聲大哭。太子言。汝憶過去提和竭佛時。我爲婆羅門子。汝爲女賣花。我以五百金錢買汝五花。汝寄二花。以上於佛。願爲我妻。我時要汝莫違我意。汝荅可爾。今何亂我善施心耶。帝釋知其心堅。復化爲婆羅門。亦十二醜。就其乞妻。太子卽施。却來寄太子所。太子怪問。方荅云。我是天帝。故來相試。遂復天身。令其求願。妻有三願。一願賣我子。還至本國。二願我子不至飢苦。三願我及太子早還本國。帝釋曰。如汝所願。太子發願言。願一切衆生。皆得度脫。生老病死之苦。帝釋歎言。大哉是願。非我所能。更求何願。又願言。今且願大富。常行布施。又願國王大臣。皆思見我。帝釋言。如意。婆羅門將子歸。婦瞋何用。王種別

求奴婢。遂外國賣子。帝釋謗無買者。遂至本國。國人識之。白王。王欲抱之。啼不肯就。問賣男子。先言男銀錢一千。特牛百頭。女銀錢二千。特牛二百。王問何以女貴男賤。荅言。王之後宮。與王無親。出自微賤。而受榮寵。王唯一子。逐之深山。曾不眷念。明知女貴男賤。王遂令人追太子。還付以寶藏。恣其布施。遂致得佛。父卽淨飯。母卽摩耶。妃卽瞿夷。男卽羅睺。女卽現羅復成利母。婆羅門卽調達。妻卽旃遮那摩。山上道人卽日連。獵師卽阿難。又如菩薩本緣者。經有三卷。今當第一一半向後。至第二卷一半向前。然其緣起。全似須大拏。但彼施一男一女。此施二子皆男。又加乞眼。略無王請歸。餘多同也。更復略引一切持王好施。施王白象。行蓮花上。力能敵國。國人大臣皆悉恐懼。又慮敵國來侵。遂令擯王子於雪山。山中施二子與醜婆羅門。婆羅門賣之至本國。祖王驚歎。後帝釋化爲婆羅門乞妻。王子施之。便云。汝妻端正。恐爲賊劫。且寄於汝。我要當取。王子聞已。默然受之。復化婆羅門。從之乞眼。王子欲挑。復止之云。我今未用。且寄汝處。我要當取。王子云。我云何受二種寄附。釋知心。還復天身云。妻及目二物。是我所有。今且寄汝。勿復施人。飛空而去。雨花稱讚。必證菩提。

菩薩爾時。乘薩婆若心。行一切施。淨修菩薩布施之道。其心清淨。無有中悔。罄捨所珍。求一切智。令諸衆生。淨深志樂。成菩提行。觀菩薩道。念佛菩提。住佛種性。

疏二菩薩爾時。下。明能施心。於中初自分所依。

菩薩摩訶薩。成辦如是布施心已。決定志求如來之身。自觀己身。繫屬一切。不得自在。又以其身。普攝衆生。猶如寶洲。給施一切。未滿足者。令其滿足。菩薩如是護念衆生。欲令自身作第一塔。普使一切皆生歡。

喜欲於世間生平等心。欲爲衆生作清涼池。欲與衆生一切安樂。欲爲衆生作大施主。智慧自在。了知菩薩所行之行。而能如是大誓莊嚴。趣一切智。願成無上智慧福田。普念衆生。常隨守護。而能成辦自身利益。智慧光明。普照於世。常勤憶念菩薩施心。恆樂觀察如來境界。

疏後菩薩摩訶薩下。勝進所爲。初結前生後。次自觀下。觀身不堅。況於妻子。後又以下。而修堅固二利之法。

佛子。菩薩摩訶薩。以無縛無著解脫心。布施妻子。所集善根如是迴向。所謂願一切衆生。住佛菩提。起變化身。周徧法界。轉不退輪。願一切衆生。得無著身。願力周行一切佛刹。願一切衆生。捨愛憎心。斷貪恚結。願一切衆生。爲諸佛子。隨佛所行。願一切衆生。於諸佛所。生自己心。不可沮壞。願一切衆生。常爲佛子。從法化生。願一切衆生。得究竟處。成就如來自在智慧。願一切衆生。證佛菩提。永離煩惱。願一切衆生。能具演說佛菩提道。常樂修行無上法施。願一切衆生。得正定心。不爲一切諸緣所壞。願一切衆生。坐菩提樹。成最正覺。開示無量從法化生諸善男女。

疏二佛子下。明迴向行。有十一願。初一依於施心。欲令普徧故。次二依妻立願。次三及後一依子立願。生自己心。如己骨肉等故。餘通依上三立願。

疏然所施化實。應成四句。一乞者是化所施爲實。如賢愚經說。毘沙門化作夜叉。從王乞子等。此破菩薩執故。鈔然所施下。第二料揀。言如賢愚經毘沙門等者。卽第一經。因梵王請佛說法。佛辭衆生垢蔽。不如速滅。梵王遂引昔緣勸佛。昔無數劫。爲生求法。乃至一偈。以身心妻子。而用施與。何不念昔。

而欲奔生。過去久遠於閻浮提。有大國王。號修樓婆。領此世界。八萬四千小國。初以財施。後思以堅實法施。遂慕說者。毘沙門王。見欲往試。變作夜叉。色貌青黑。眼赤如血。鉤牙外出。頭髮悉豎。詣王宮門云。我能說法。王請入宮。欲請說法。彼云。先以所愛夫人及所愛子與我食者。乃與汝法。王卽以所愛夫人及兒中勝者與之。夜叉食竟。爲王說偈云。一切行無常。生者皆有苦。五陰空無相。無有我我所。王聞歡喜。書寫流布。無有悔恨。毘沙門遂復本身。讚云。奇特夫人及子。猶存如故。王者是佛。昔爲法尙爾。今何速滅。釋曰。此則妻子是實。乞者是化。此破菩薩執者。如淨名云。十方世界中。作魔王者。多是住不思議。解脫菩薩。以方便力。現作魔王。故云破菩薩執。

疏二乞者是實。所施是化。如攝論說。毘荀陁王。捨子與婆羅門。是化無惱。以菩薩方便。滿乞意故。鈔二乞者是實者。引第十一梁攝論云。或現種種本生。由逼惱他。及逼惱怨對。令他相愛利益安樂心。釋論曰。爲化邪見衆生。不信因果。令得正法。離惡修善故。化現種種本生。如毘荀陁王。捨兒與婆羅門。非是逼惱他。此兒是化作。何以故。菩薩無逼惱此人。生彼人安樂故。又如藥藏菩薩。令眉絺王與毘提訶王相逼惱。此亦是化作。後悉令相愛利益安樂心。菩薩行如是事。有何利益。論曰。生他信心爲先。後於三乘聖道中。彼善根成熟。是名菩薩甚深制差別。

疏三者俱化。旁警衆生。鈔三俱化可知。

疏四者俱實。復有二種。一始行者。欲將施時。再三本問。故瑜伽三十九說。施妻子時。先當曉諭。令喜。終不強逼。令其憂惱。於來乞者。雖以正言曉諭。不施冤家等。二根熟者。其所施人。多與菩薩同結志願。互

爲主伴。今將爲施。遂本所祈故。下經云。生生行施處。願常以我施。鈔四俱實者。如一切施王。施兒與婆羅門。婆羅門鞭打而持去。至一樹下。更欲打之。樹神手擬婆羅門。婆羅門卽倒。神欲斷彼命。奪王子送還。王子告神。請勿害之。我若再還。令我父王檀行不足。卽爲不孝之子。神遂放之。此卽妻子同行也。尙須自捨身命。豈有辭苦而退。言生生行施處者。卽七十五釋迦女瞿波昔緣中事。當時妙德童女。欲事太子。太子要云。恐爲其郭修菩薩道。彼女意云。我無染心。請爲主者。偈白太子。中有偈云。無量劫頂戴廣大金剛山。若能眷納我。甘心受此苦。無量生死海。以我身肉施。汝得法王處。願令我亦然。若能眷納我。與我爲主者。生生行施處。願常以我施。釋曰。斯皆根熟之者。

是爲菩薩摩訶薩。布施妻子善根。迴向爲令衆生皆悉證得無礙解脫。無著智故。佛子。菩薩摩訶薩。莊嚴舍宅。及諸資具。隨有乞求。一切施與。行布施法。於家無著。遠離一切居家覺觀。厭惡家業。資生之具。不貪不味。心無繫著。知家易壞。心恆厭捨。都於其中。無所愛樂。但欲出家修菩薩行。以諸佛法。而自莊嚴。一切悉捨。心無中悔。常爲諸佛之所讚歎。舍宅財物。隨處所有。悉以惠施。心無戀著。見有乞求。心生喜慶。

疏五十七施宅舍可知。

菩薩爾時。以此善根。如是迴向。所謂願一切衆生。捨離妻子成就出家第一之樂。願一切衆生。解脫家縛。入於非家。諸佛法中修行梵行。願一切衆生。捨離慳垢。樂一切施。心無退轉。願一切衆生。永離家法。少欲知足。無所藏積。願一切衆生。出世俗家。住如來家。願一切衆生。得無礙法。滅除一切障礙之道。願一切衆

生離家屬愛。雖現居家。心無所著。願一切衆生。善能化誘。不離家法。說佛智慧。願一切衆生。身現在家。心常隨順佛智。而住。願一切衆生。在居家地。住於佛地。普令無量無邊衆生。發歡喜心。是爲菩薩摩訶薩。布施舍宅時。善根迴向。爲令衆生。成就菩薩種種行願。神通智故。

佛子。菩薩摩訶薩。布施種種園林臺榭遊戲快樂莊嚴之處。作是念言。我當爲一切衆生。作好園林。我當爲一切衆生。示現法樂。我當施一切衆生。歡喜之意。我當示一切衆生。無邊喜樂。我當爲一切衆生。開淨法門。我當令一切衆生。發歡喜心。我當令一切衆生。得佛菩提。我當令一切衆生。成滿大願。我當於一切衆生。猶如慈父。我當令一切衆生。智慧觀察。我當施一切衆生。資生之具。我當於一切衆生。猶如慈母。生長一切善根大願。

疏五十八施園林等。施行中二。先標起念。

佛子。菩薩摩訶薩。如是修行諸善根時。於惡衆生。不生疲厭。亦不誤起棄捨之心。設滿世間一切衆生。悉不知恩。菩薩於彼。初無嫌恨。不生一念求反報心。但欲滅其無量苦惱。於諸世間。心如虛空。無所染著。普觀諸法。真實之相。發大誓願。滅衆生苦。永不厭捨。大乘志願。滅一切見。修諸菩薩平等行願。疏後佛子下。離過成德。餘可知。

大方廣佛華嚴經疏鈔會本卷九十一

佛子。菩薩摩訶薩。如是觀察已。攝諸善根。悉以迴向。所謂願一切衆生。念念滋生無量善法。成就無上園林之心。願一切衆生得不動法。見一切佛。皆令歡喜。願一切衆生。樂法園苑。得諸佛刹園苑妙樂。願一切衆生得淨妙心。常見如來神足園林。願一切衆生得佛戲樂。常善遊戲智慧境界。願一切衆生得遊戲樂。普詣佛刹道場衆會。願一切衆生成就菩薩解脫遊戲。盡未來劫行菩薩行。心無疲倦。願一切衆生見一切佛充滿法界。發廣大心住佛園林。願一切衆生悉能徧往一切佛刹。一一刹中供養諸佛。願一切衆生得善欲心。清淨莊嚴一切佛刹。

是爲菩薩摩訶薩布施一切園林臺榭善根迴向。爲令衆生見一切佛遊戲。一切佛園林故。佛子。菩薩摩訶薩。作百千億那由他無量無數廣大施會。

疏五十九設大施會。初施行中。初總標。

一切清淨諸佛印。可終不損惱於一衆生。普令衆生遠離衆惡。淨三業道。成就智慧。

疏次一切下離過成德。擇薪而爨。瀘水而用。不強乞求。名不惱衆生。今多反此。豈成大益。

開置無量百千億那由他阿僧祇清淨境界。積集無量百千億那由他阿僧祇資生妙物。

疏次開置下。略顯儀式。

發甚難得菩提之心。行無限施。令諸衆生住清淨道。初中後善。生淨信解。隨百千億無量衆生心之所樂。

悉令歡喜。以大慈悲救護一切。承事供養三世諸佛。爲欲成就一切佛種。修行布施。心無中悔。增長信根。成滿勝行。念念增進。檀波羅蜜。

疏次發甚難得下。顯施所依心。成波羅蜜。

菩薩爾時以諸善根如是迴向。所謂願一切衆生發大乘心。悉得成就摩訶衍施。願一切衆生皆悉能行大會施。盡施善施。最勝施。無上施。最無上施。無等等施。超諸世間施。一切諸佛所稱歎施。願一切衆生作第一施主。於諸惡趣。勉濟衆生。皆令得入無礙智道。修平等願。如實善根。得無差別證自境智。願一切衆生安住寂靜諸禪定智。人不死道。究竟一切神通智慧勇猛精進。具足諸地。莊嚴佛法。到於彼岸。永不退轉。願一切衆生設大施會。終不疲厭。給濟衆生。無有休息。究竟無上一切種智。願一切衆生恆勤種植一切善根。到於無量功德彼岸。願一切衆生常蒙諸佛之所稱歎。普爲世間作大施主。功德具足。充滿法界。徧照十方。施無上樂。願一切衆生設大施會。廣集善根。等攝衆生。到於彼岸。願一切衆生成最勝施。普令衆生住第一乘。願一切衆生爲應時施。永離非時。大施究竟。願一切衆生成就善施。到佛丈夫大施彼岸。願一切衆生究竟常行大莊嚴施。盡以一切諸佛爲師。悉皆親近。興大供養。願一切衆生住清淨施。集等法界無量福德。到於彼岸。願一切衆生於諸世間爲大施主。誓度羣品。住如來地。是爲菩薩摩訶薩。設大施會善根迴向。

爲令衆生行無上施。究竟佛施。成就善施。不可壞施。供諸佛施。無恚恨施。救衆生施。成一切智施。常見諸佛施。善精進施。成就一切菩薩功德。諸佛智慧廣大施故。

佛子。菩薩摩訶薩。布施一切資生之物。心無貪惜。不求果報。於世富樂無所希望。離妄想心。

疏六十施資具者。以別說諸門不可盡故。末後總說一切資具。文但有二。一施行。二迴向行。以鄰後都結。故闕後二。今初有四。一施時離過。

善思惟法。爲欲利益一切衆生。審觀一切諸法實性。

疏二善思惟下。辨施所依。

隨諸衆生種種不同。所用所求。各各差別。成辦無量資生之具。所有嚴飾。悉皆妙好。行無邊施。行一切施。盡內外施。

疏三隨諸衆生下。正明施行。

行此施時。增志樂力。獲大功德。成就心寶。常能守護。一切衆生。皆令發生殊勝志願。初未曾有求反報心。所有善根。等三世佛。悉以圓滿一切種智。

疏四行此施下。顯所成德。

佛子。菩薩摩訶薩。以此布施。所有善根。迴向衆生。

疏二佛子下。明迴向行中。二先牒前起後。後願一切下。正顯。

願一切衆生清淨調伏。願一切衆生滅除煩惱。嚴淨一切諸佛刹土。願一切衆生。以清淨心。於一念中。周徧法界。願一切衆生。智慧充滿。虛空法界。願一切衆生。得一切智。普入三世調伏衆生。於一切時。常轉清淨不退法輪。願一切衆生。具一切智。善能示現神通方便。饒益衆生。願一切衆生。悉能悟入諸佛菩提。盡

未來劫於十方世界常說正法。曾無休息。令諸衆生普得聞知。願一切衆生。於無量劫修菩薩行。悉得圓滿。願一切衆生。於一切世界。若染若淨。若小若大。若麤若細。若覆若仰。或一莊嚴。或種種莊嚴。所可演說。在世界數諸世界中。修菩薩行。靡不周徧。願一切衆生。於念念中。常作三世一切佛事。教化衆生。向一切智。

疏顯中十願。資生多種。願亦類別。一施洗滌資具願。二施掃拭資具願。餘可準思。又資具總明。願亦常發。未必別配。上來依標別顯善根迴向竟。

佛子。菩薩摩訶薩。隨諸衆生一切所須。以如是等阿僧祇物。而爲給施。

疏第三從佛子菩薩摩訶薩隨諸衆生下。總結多門善根迴向。別不可盡。故此總明。文分二別。先結善根。卽前施行後佛子下。結前迴向。今初分三一。結所施物。謂菩薩所施。非止六十。故等以僧祇二爲令下。結施所爲。三時十方下。結能施心。

爲令佛法相續不斷。大悲普救一切衆生。安住大慈。修菩薩行。於佛教誨。終無違犯。以巧方便。修行衆善。不斷一切諸佛種性。隨求悉與。而無患厭。一切悉捨。未曾中悔。常勤迴向一切智道。

疏二中文含二意。以初貫後。卽是所爲。若依大悲等而行布施。是施所依。所爲卽通爲自他。所依則自心所住。瑜伽三十九云。又諸菩薩。於諸有怨。以慈意樂而行惠施。於諸有苦。以悲意樂。於諸有德。以喜意樂。於諸有恩。親善同意。以捨意樂。而行惠施。常知亦名菩薩。巧慧而行布施。文中初句總。後大悲下。別顯不斷之相。謂以四等心而行萬行。爲相續不斷。初悲次慈。不斷一切下。明其大捨。後段廣明大喜。

又下離相亦是起捨。

時十方國土種種形類種種趣生種種福田皆來集會。至菩薩所種種求索。菩薩見已。普皆攝受。心生歡喜。如見善友。大悲哀愍。思滿其願。捨心增長。無有休息。亦不疲厭。隨其所求。悉令滿足。離貧窮苦。

疏三結能施心中。初對多田生喜離過。

時諸乞者。心大欣慶。轉更稱傳。讚揚其德。美聲遐布。悉來歸往。菩薩見已。歡喜無量。

疏二時諸乞下。明其田彌多。其喜彌廣。

假使百千億那由他劫。受帝釋樂。無數劫。受夜摩天樂。無量劫。受兜率天樂。無邊劫。受善變化天樂。無等劫。受他化自在天樂。不可數劫。受梵王樂。不可稱劫。受轉輪王王三千樂。不可思劫。受徧淨天樂。不可說劫。受淨居天樂。悉不能及。

疏三假使下。校量顯廣。略舉十王所受之樂。不及菩薩喜樂之心。其中色天闕於光音。若依瓔珞十五輪王。則二禪王當第十三。應言王二千樂。若王三千。即當第十四。覺德光相輪。作三界王。當等覺菩薩也。又依十大數。不可思後有不可量。今文闕此。則似梵本脫於二禪四禪已上。雖捨受相應地無報樂。而有定樂。凡是禪定。皆有輕安適悅之樂故。又云那含。分有解脫樂故。無色界中。報非顯現。故此不言。若依大丈夫行論中。菩薩喜樂。過於世間。及二乘涅槃。今但過世間者。淨居天中。兼二乘樂。鈔若依瓔珞者。即三賢十聖等妙二覺。至隨好品當廣分別。此中即是三禪梵王。若依大丈夫行論。論有二卷。或單云大丈夫論。廣說世間勝樂之事。皆不及菩薩見乞歡喜。未舉解脫之樂。亦不能及。即過二乘也。

提。菩薩摩訶薩見乞者來歡喜愛樂欣慶踊躍信心增長志樂清淨諸根調順信解成滿乃至增進諸佛善

疏四菩薩摩訶薩下結喜廣深何等菩薩見乞生喜謂施行熟故施障盡故言施障者瑜伽三十九云又諸菩薩於施障及對治如實了知施障有四一先未慣習二施物鮮闕三耽著上妙物四欣樂當來具足財果云何對治若現有施物乞者現前而施心不發應觀此心由往習故今若不施後世之中定背施行故應勵力思擇而行惠施二觀宿業過今受飢渴乏少之苦尙應亡軀況有少活命而不行施三應觀妄樂能生當苦四應觀當果是邪果報速滅離散求大菩提鈔瑜伽三十九云等者於中有三初標舉二列鄣三明治前二具論文對治中略取論意耳然論文繁廣收義無遺論後結云如是菩薩四種施障當知四種能對治智對治於彼一者覺悟二者忍受衆苦三者徧知顛倒四者見一切行性不堅牢是諸菩薩由前三種能對治智決定堪能正行惠施由後一種能對治智能正攝受施福勝果當知亦名菩薩巧慧而行布施

佛子菩薩摩訶薩以此善根爲欲利益一切衆生故迴向爲欲安樂一切衆生故迴向爲令一切衆生得大義利故迴向爲令一切衆生悉得清淨故迴向爲令一切衆生悉求菩提故迴向爲令一切衆生悉得平等故迴向爲令一切衆生悉得賢善心故迴向爲令一切衆生悉入摩訶衍故迴向爲令一切衆生悉得賢善智慧故迴向爲令一切衆生悉具普賢菩薩行願滿十力乘現成正覺故迴向

疏第二結前迴向迴向隨義已具上文今但結其迴向所爲則顯前來別別迴向不出於此可知

佛子。菩薩摩訶薩。以諸善根如是迴向時。身口意業皆悉解脫。無著無繫。

疏大文第二。佛子。菩薩摩訶薩。以諸善根如是迴向時。下。離相迴向。卽向實際。行稱涅槃。此彰行深。前彰行廣。深廣同時。言不並耳。文分爲二。先正明離相。後菩薩如是觀察。下。不礙隨相。前中三。初略標。二無衆生下。別顯三。何以故。下。微釋。今初三句。解脫是總。不著於解。不繫於縛。是真解脫。

無衆生想。無命者想。無補特伽羅想。無人想。無童子想。無生者想。無作者想。無受者想。

疏二。別顯中分二。一。內絕想念。故無縛解。二。佛子。下。觸境離染。故無縛解。今初分二。先明絕想。後如是下。彰其行成。前中又二。先絕我想。但法上妄執。故具如前釋。鈔先絕我者。卽歡喜行中。

無有想。無無想。無今世後世想。無死此生彼想。無常想。無無常想。無三有想。無無三有想。非想非非想。

疏後無有想。下。絕其法想。前段以法奪我。今則以我除法。旣無有我。則無我所。故法我無礙。文有六對。

一。不於法體起增減想。二。於法時離三世想。三。於分位離流轉想。四。於法義離斷常想。五。於影像離依處想。六。於法本遣心非心想。鈔一。不於法體者。一切法體。不出有無。定有則增益。定無則損減。四於諸法者。就一有上。卽有常無常義。從緣而有。卽是無常。不從緣有。卽名爲常。五。三有器界。唯識頓變。名爲影像。爲生所依。想卽是心。非想非心。六。於法本遣心非心想。以上諸句。皆有想言。一切諸法皆想所持。通是有心之義。心爲法本。故忘心卽爲非想。今並遣之。故云六於法本遣心非心想耳。疏無之所以。下。經自釋。今且略明。初對爲總。言無有想者。有卽空故。二。空一味。等無差故。言無無想。乃有五意。一。以事例無。有法觸目。尙不生想。無法無物。安可念耶。二者相無來去。故謂有本自無。非有去。

無來。卽以此義。則無可無也。故無無想。三者有卽非有。不可謂之爲有。況得言無。則言思道斷。四者假非。有以遣有。非謂有於非。有故復遣之。五者以是法無我理。非是斷無。必不礙有。故無無也。故下釋云。非有非非有矣。有無旣寂。俱及俱非。豈常有寄。餘對例知。鈔有卽空故者。約緣有明。二空一味等無差故。約眞如說。皆無有義。然法相所立。依他緣有。圓成性有。今明緣有。故非有二空爲性。性卽非有。言無無想者。初一遣無物之無。如虛空龜毛兔角等。二明緣有卽無故。淨名云。色卽是空。非色滅空。色性自空。明有卽無故。此明非滅色之空也。三明遣無爲有。四遣無爲非有。三四俱遣以空爲有義。五者上四遣病。明非有此句。顯實明非有不礙有故。故下釋云。非有非非有矣。引證也。此非非有卽是非無。但言非無。含義則少。言非非有。含義則多。但言非無。得前二義。後之二義。言非非有。方始攝也。然第一義卽古人云。我言非有者。但言非是有。非謂是非有。五明有卽空。故非有空卽有。故非非有。上之五句。但順經文以爲二句。此下總遣四句。合上卽俱句。相奪卽俱非。有無之本旣無。俱句非俱何立。疏末對總結前有無等想。總名爲想。一切都絕。是曰無想。假非想以遣想。非有非想。故云非非想。餘義例知。鈔末對釋結句。非非想中。唯取第四意耳。亦可兼於第五。不礙想耳。

如是非縛迴向。非縛解迴向。非業迴向。非業報迴向。非分別迴向。非無分別迴向。非思迴向。非思已迴向。非心迴向。非無心迴向。

疏二顯行文有五對。初對爲總。由絕如是我法想故。無有縛解。謂非想故。非縛。非非想故。非解。下四對別。初對唯語於縛。但因果之異。由無作者及受者故。次對雙顯縛解。由無有無等想故。卽顯上來有

分別業。無分別業。二皆絕故。次雙顯二業。行俱爲思。行後爲思已。後對亦雙明縛解。卽思所依王。有心則生死波浪。無心則同乎外道。又以無心爲是。則未免於有。故皆非之。鈔次對雙顯者。以分別爲縛。無分別爲解也。次對雙顯二業者。卽思及思已而爲二也。後對亦雙明者。有心則生死波浪。故非心迴向。無心則同乎外道。故非無心迴向。此則無不礙有義。又以無心下。拂迹以明。前意言有心爲非有者。有起動也。言無心爲非者。無觀照也。此則寂不失照。後意則寂乎唯寂。二皆有理。

佛子。菩薩摩訶薩如是迴向時。不著內。不著外。不著能緣。不著所緣。不著因。不著果。不著法。不著非法。不著思。不著非思。

疏第二觸境離染無縛解者。文分爲三。初明無著。次辨不縛。後明不解。心染於境。故名爲著。由境纏心。故名爲縛。楞伽云。心縛於境界。覺相智隨轉。此之謂也。離於心境。故名爲解。今初無著中。初牒前起後。謂內無想念。迴向之時。則於諸境。心無所著。文有十六句。初十句。五對顯界處空。故不染著。內謂六入。外謂六塵。次對兼前。卽十八界。能緣是識。所緣通於內外。因果一對。卽界處爲緣所生之法。法與非法。總顯諸法。通其三義。一則有無。二則善惡。三則性相。已如上辨。末後一對。別語業體性相。不著色。不著色生。不著色滅。不著受想行識。不著受想行識生。不著受想行識滅。

疏後之六句。顯不著蘊。大般若中。觀色等有三一相。二生滅。三無生滅。今不著前二。卽契無生滅。不著色者。卽是色相。知色緣成。如聚沫。故不著生滅者。生無所來。滅無所至。故由此則入無生滅理。後之四蘊。俱相有異。餘二並同。已遣三科。則無所遺矣。

佛子。菩薩摩訶薩。若能於此諸法不著。則不縛色。不縛色生。不縛色滅。不縛受想行識。不縛受想行識生。不縛受想行識滅。

疏二佛子。下明其不縛。縛著雖異。義不出前。

若能於此諸法不縛。則亦於諸法不解。

疏三若能下。明其不解。若本無縛。其誰求解。離縛取解。未免於縛。故復遣之。遣之又遣。以至無遣。儻然無寄理。自玄會矣。鈔若本無縛。其誰求解者。卽開用淨名不二法門中寶印手菩薩曰。樂涅槃不樂世間爲二。若不樂涅槃。不厭世間。則無有二。所以者何。若有縛。則有解。若本無縛。其誰求解。無縛無解。則無樂厭。是爲入不二法門。儻然無寄者。此言出肇公百論序。彼有二對。具云。其爲論也。言而無當。破而無報。儻然靡據。而事不失。眞蕭焉無寄。而理自玄會。反本之道。著乎茲矣。釋曰。此通說論旨。前對不。失事後對不。失理。雖不據說於事理。而契當於事理。今疏合其二對。但取不失於理。以是離相迴向。故。儻者儻。廣雅云。儻者卓異也。謂無所依據。卓異繫象。而暗與理會矣。

何以故。

疏三徵釋中。先徵意云。設我假立法體。不無。今無念著。其故何耶。

無有少法。若現生。若已生。若當生。無法可取。無法可著。一切諸法。自相如是。無有自性。自性相離。

疏後釋意云。法性爾故。文分爲二。初總顯法體離相。後非一下。別彰所離。今初先顯法體無生。故不可取著。卽般若中第三義也。三世求生。不可得故。從無而有。故名爲生。已生已有。不可名生。如母已有。不

名生故。未生未有。亦不名生。若未生名生。衆生菩提。應名爲生。諸未生法。悉應名生。現在之法。剎那不住。恆屬已未。離於已未。無別現故。爲生之理。不出三世。三世旣無。生將安寄。旣無有生。則亦無滅。無生無滅。則無境可取於何執著。鈔三世求生者。卽總顯文意。是中論三時門。從無而有。故名爲生者。立生之理。下別出三世求不得生相。已生未生。正生爲三。已未不生。理易彰顯。現在正生之理。隱故。以不住故。過未分之。則無現在之正生也。正同淨名。若過去生。過去生已滅。若未來生。未來生未至。若現在生。現在生無住。以無住故。卽屬已未。從爲生之理下。結成無生。

疏次應問云。生是能生之相。可許推無。所相法體。豈應非有。故復釋云。一切諸法。自相如是。離生滅外。有爲法體。不可得故。從緣而生。相卽無相故。生卽無生故。此顯相空。次應問云。法從緣生。相可觸目。云何言無。故復釋云。從緣而生。無自性故。此顯性空。自性相離。雙結上二。又顯法本自離。非推之使離。非一非二。非多非無量。非小非大。非狹非廣。非深非淺。非寂靜非戲論。非處非非處。非法非非法。非體非非體。非有非非有。

疏二別彰所離者。上但云離。爲離何相。謂一二等。文有十對。初二約數。次二約量。外望論大小。內望論廣陞。次二約理智。淺深約事理。靜論語識智。次二約教法。處非處者。邪正教相對。法非法者。善惡相對。後二約體相。初對約體。色心之體。不可得故。離色心外。非體之法。亦叵得故。後對約相。爲法之相。不出有無。設非有非無。若有此者。亦不出有。若無此句。亦不出無。但遣有無。萬法斯寂。由離性相。故觸法斯非。鈔靜論語識智者。然依智不依識。識是戲論。智是寂靜。今並雙非。則不可以智知。不可以識識矣。

卽法四依。四依之義。下文當釋。

菩薩如是觀察諸法。則爲非法。於言語中。隨世建立非法爲法。不斷諸業道。不捨菩薩行。求一切智。終無退轉。了知一切業緣如夢。音聲如響。衆生如影。諸法如幻。而亦不壞。因緣業力。了知諸業。其用廣大。解一切法。皆無所作。行無作道。未曾暫廢。

疏第二菩薩如是觀察下。不礙隨相者。凡情封執。觸言生滯。聞於離相。則謂乖前隨相之言。失於業果。菩提之行。故此略爲雙會二文。言隨相者。約隨俗說。言離相者。約勝義說。諸佛依二諦爲衆生說法。此之謂也。鈔諸佛依二諦者。卽中論四諦品下更偈云。一以世俗諦。二第一義諦。若人不能知。分別於二諦。則於深佛法。不知真實義。前已引竟。

疏然俗是真俗。則不壞假名而說實相。故云觀察諸法。則爲非法。真是俗真。故不動實際。建立諸法。故云於言語中。隨世建立非法爲法。由建立故。不斷諸業道。則不壞世間。不捨下。不壞出世因果。次了知下。卻釋觀察諸法。則爲非法。初了俗卽真。而不壞俗。謂依他業緣等。皆如夢幻。無真實故。俗卽爲真。由卽俗而真。故不壞因果。本來自真。不假壞。故不妨了業。其用廣大。謂業雖如幻。一念幻惡。長劫沉淪。一念幻善。遠階佛果。故云廣大。次解一切下。明了俗卽真。不礙修真。無作真道。尙須修行。若不修行。不契真故。況不壞俗。寧無修證。隨相離相。準此應知。此二無礙。異於凡小。鈔然俗是真俗。下融上二諦。成無礙義。

佛子。此菩薩摩訶薩。住一切智。若處非處。普皆迴向一切智性。於一切處皆悉迴向。無有退轉。

疏大文第三。佛子。此菩薩摩訶薩住一切下。釋迴向名。文分爲二。初總釋。後以何下別釋。今初住一切智。是自善根。由此能成下諸義故。若處已下。釋平等隨順義。若約對境。處卽是善。非處爲惡。若約自行。處卽隨相。非處離相。處非處殊。皆向智性。於一切處。悉皆迴向。是隨順一切善根義。迴向智性是迴向義。無有退轉。是堅固義。又向智性。亦堅固義。

以何義故。說名迴向。永度世間。至於彼岸。故名迴向。永出諸蘊。至於彼岸。故名迴向。度言語道。至於彼岸。故名迴向。離種種想。至於彼岸。故名迴向。永斷身見。至於彼岸。故名迴向。永離依處。至於彼岸。故名迴向。永絕所作。至於彼岸。故名迴向。永出諸有。至於彼岸。故名迴向。求捨諸取。至於彼岸。故名迴向。永出世法。至於彼岸。故名迴向。

疏二別釋中。三初假徵起。釋迴向義。二佛子下。釋隨順義。三又佛子。釋堅固一切善根義。今初然隨相之名。以堅固心修諸善行。皆願衆生向菩提果。不言自顯。而離相受稱。非釋不知。所以偏明。故徵起云。離相之中。無能所殊。以何義故。說名迴向。下隨順等。例此可知。鈔然隨相之名。下疏文有二。一辨來意。

疏略顯十義。雖一離相。得成迴向。謂但能離相。順一切智。則自度世等。至於彼岸。豈非迴向義耶。鈔二略顯十義下。正明離相。受迴向名。前卽假徵。此下解釋。於中有二。先總。

疏一過世八法。至不動岸。鈔後一過世八法下。別各隨所趣。立彼岸別。今初利衰毀譽稱譏苦樂。此之八法。卽世間法。八法不動。名不動岸。

疏二度我我所至解脫岸。鈔二依蘊計我故有二我。若離二我名爲解脫。

疏三離尋伺至實際岸。鈔三尋伺卽言語道。道是因故。實際絕言故。

疏四滅盡諸想至實智岸。鈔四念想觀除爲實智故。

疏五離煩惱本至有餘岸。鈔五身見以爲煩惱障本。故但能斷。便是有餘。

疏六離苦依身至無餘岸。鈔六苦依身卽爲依處。智所依身。身智俱亡。爲無餘也。

疏七出一切業至施等岸。鈔七施等卽是所作善法故。

疏八出三界至無住涅槃岸。鈔八菩薩出有入無而無染故。爲無住岸。

疏九盡有漏至法身岸。鈔九證於法身。是無漏界故。

疏十出生住滅見。至自覺聖智岸。鈔十生住異滅。卽是有爲世間之法。覺心現量。生滅流注。無有自性。故成自覺聖智岸也。

佛子。菩薩摩訶薩。如是迴向時。則爲隨順佛住。隨順法住。隨順智住。隨順菩提住。隨順義住。隨順迴向住。隨順境界住。隨順行住。隨順真實住。隨順清淨住。

疏二釋隨順。然下二段兼顯益相。正爲釋名。亦應徵云。實際之內。誰是能隨。誰是所隨。故此釋云。但能如是離相迴向。自然隨順佛法智等。以佛法等實爲體故。

佛子。菩薩摩訶薩。如是迴向。則爲了達一切諸法。則爲承事一切諸佛。無有一佛而不承事。無有一法而不供養。無有一法而可滅壞。無有一法而可乖違。無有一物而可貪著。無有一法而可厭離。不見內外一

切諸法有少滅壞。違因緣道。法力具足。無有休息。

疏三釋堅固。一切善根亦合徵云。實際非相。何名堅固。實際無差。何名一切。此釋意云。如是離相迴向。方名堅固。凡是有相。可破壞故。但能離相。自成諸善。諸善皆以實際而爲體故。於中一不了法。無相。不名爲了故。二佛以法爲身心。詣於法爲事佛故。三若身承事。則有事不事。若事於理。則一事一切事。佛無二體故。四如理修行。眞供養故。五相卽無相。不須滅壞。六無非無相。不可乖違。七八染淨皆空。無貪無厭。九世閒常住故。無少滅壞。隨緣起滅故。不違因緣。十究此根源。法力方具。又由無礙。故名具足。佛子是爲菩薩摩訶薩。第六隨順堅固一切善根迴向。

疏第三依釋結名可知。

菩薩摩訶薩。住此迴向時。常爲諸佛之所護念。堅固不退。入深法性。修一切智。隨順法義。隨順法性。隨順一切堅固善根。隨順一切圓滿大願。具足隨順堅固之法。一切金剛所不能壞。於諸法中而得自在。

疏大文第二菩薩摩訶薩住此迴向時。下明位果。隨離無二。招斯十果。

爾時金剛幢菩薩。觀察十方觀察衆會。觀察法界。已入於字句甚深之義。修習無量廣大之心。以大悲心普覆世閒。長去來今。佛種性心。入於一切諸佛功德。成就諸佛自在力身。觀諸衆生心之所樂。隨其善根。所可成熟。依法性身。爲現色身。承佛神力。而說頌言。

疏第二應頌。先說因緣有十二句。初一總辨儀式。後一總明所依。前文屢釋。中間十句。別顯二義。初二儀式。一觀所被。二徹事理。上觀察言。通心及眼。下辨所依。一依教智。次下三句。依廣大心。初句爲總大。

悲普覆。卽上廣心。長佛種性。卽前大心。次二句上依果德。一依說德。二依說身。次二依權智。觀樂觀宜。後句依體起用。

菩薩現身作國王。於世位中最無等。福德威光勝一切。普爲羣萌興利益。其心清淨無染著。於世自在咸遵敬。宏宣正法以訓人。普使衆生獲安隱。現生貴族升王位。常依正教轉法輪。稟性仁慈無毒虐。十方敬仰皆從化。智慧分別常明了。色相才能皆具足。臨馭率土靡不從。摧伏魔軍悉令盡。堅持淨戒無違犯。決志堪忍不動搖。永願蠲除忿恚心。常樂修行諸佛法。

疏後正顯偈四十一頌。長分爲三。初五偈頌行所依身。次飲食下三十偈半。頌依身起行。後隨順下有五偈半。頌釋名中隨順等義。兼頌位果。

飲食香鬘及衣服。車騎牀褥座與燈。菩薩悉以給濟人。并及所餘無量種。爲利益故而行施。令其開發廣大心。於尊勝處及所餘。意皆清淨生歡喜。菩薩一切皆周給。內外所有悉能捨。必使其心永清淨。不令暫爾生狹劣。或施於頭。或施眼。或施於手。或施足。皮肉骨髓及餘物。一切皆捨心無悋。菩薩身居大王位。種族豪貴人中尊。開口出舌施羣生。其心歡喜無憂戀。以彼施舌諸功德。迴向一切諸衆生。普願藉此勝因緣。悉得如來廣長舌。或施妻子及王位。或施其身作僮僕。其心清淨常歡喜。如是一切無憂悔。

隨所樂求咸施與。應時給濟無疲厭。一切所有皆能散。諸來求者普滿足。
爲聞法故施其身。修諸苦行求菩提。復爲衆生捨一切。求無上智不退轉。
以於佛所聞正法。自捨其身充給侍。爲欲普救諸羣生。發生無量歡喜心。
彼見世尊大導師。能以慈心廣饒益。是時踊躍生歡喜。聽受如來深法味。
菩薩所有諸善根。悉以迴向諸衆生。普皆救護無有餘。永使解脫常安樂。
菩薩所有諸眷屬。色相端嚴能辯慧。華鬘衣服及塗香。種種莊嚴皆具足。
此諸眷屬甚希有。菩薩一切皆能施。專求正覺度羣生。如是之心無暫捨。
菩薩如是諦思惟。備行種種廣大業。悉以迴向諸含識。而不生於取著心。
菩薩捨彼大王位。及以國土諸城邑。宮殿樓閣與園林。僮僕侍衛皆無愒。
彼於無量百千劫。處處周行而施與。因以教導諸羣生。悉使超升無上岸。
無量品類各差別。十方世界來萃止。菩薩見已心欣慶。隨其所乏令滿足。
如三世佛所迴向。菩薩亦修如是業。調御人尊之所行。悉皆隨學到彼岸。

疏二中分兩。先十九偈。頌隨相迴向。於中初一頌標。後三頌結。中間皆頌廣顯。標顯二文。影略不具。

菩薩觀察一切法。誰爲能入此法者。云何爲入何所入。如是布施心無住。
菩薩迴向善巧智。菩薩迴向方便法。菩薩迴向真實義。於其法中無所著。
心不分別一切業。亦不染著於業果。知菩提性從緣起。入深法界無違逆。

不於身中而有業。亦不依止於心住。智慧了知無業性。以因緣故業不失。心不妄取過去法。亦不貪著未來事。不於現在有所住了。達三世悉空寂。

疏後菩薩觀察下。十一偈半。頌離相迴向。文分四別。第一五偈。頌內絕想念。於中初句總顯觀力。次句人空。餘皆法空。知菩提等者。菩提性淨。不礙從緣淨法爲緣。有菩提起。起卽無性。不違法界。是性起菩提。鈔菩提性淨下。有二菩提。一性淨。二圓淨。從緣起者。卽是圓淨。圓淨復二。一明緣起。萬行爲緣。故二明性起。全是真如性淨功德之所顯故。又緣起無性。卽性淨故。廣如出現。此亦法華云。諸佛兩足尊。知法常無性。佛種從緣起。是故說一乘義耳。前已廣引。

疏若業依身有。則不由心。若住心中。則有心皆業。既許有心無業。則業假緣生。其性安有。鈔若業依身下。釋不於身中而有業偈。

菩薩已到色彼岸。受想行識亦如是。超出世間生死流。其心謙下常清淨。諦觀五蘊十八界。十二種處及己身。於此一一求菩提。體性畢竟不可得。疏二菩薩已到下二偈。頌觸境離染。由到不可得岸。故無所著。

不取諸法常住相。於斷滅相亦不著。法性非有亦非無。業理次第終無盡。不於諸法有所住。不見衆生及菩提。十方國土三世中。畢竟求之無可得。疏三有二偈。頌前徵釋。

若能如是觀諸法。則如諸佛之所解。雖求其性不可得。菩薩所行亦不虛。

菩薩了法從緣有不違一切所行道。開示解脫諸業跡。欲使衆生悉清淨。是爲智者所行道。一切如來之所說。

疏四二偈半。頌不礙隨相。餘並可知。

隨順思惟入正義。自然覺悟成菩提。諸法無生亦無滅。亦復無來無有去。不於此死而生彼。是人悟解諸佛法。了達諸法真實性。而於法性無分別。知法無性無分別。此人善入諸佛智。法性徧在一切處。一切衆生及國土。三世悉在無有餘。亦無形相而可得。

一切諸佛所覺了。悉皆攝取無有餘。雖說三世一切法。如是等法悉非有。如諸法性徧一切。菩薩迴向亦復然。如是迴向諸衆生。常於世閒無退轉。

大方廣佛華嚴經疏鈔會本卷九十二

十迴向品第二十五

佛子。云何爲菩薩摩訶薩等隨順一切衆生迴向。

疏第七等隨順一切衆生迴向。長行中亦二。先位行。後位果。初中亦三。今初牒名徵起。謂以善根等心順益故等。卽平等。通於能所。所順衆生。無相平等。能隨順心。智照平等。此從迴向受名等。卽隨順。故本業云。以觀善惡父母無二相。一合相故。名隨順觀一切衆生迴向。名無等字。釋有等義。有云善惡卽冤親。此二平等。俱生法身。皆名父母。應云善父母者。方便般若也。惡父母者。無明貪愛也。不滅癡愛。起於明脫。故無二相。智契無二。名一合相。卽以無貪等善根而爲其性。鈔應云下。正釋義。般若方便。卽淨名及今經七十九中之意。下當廣釋。惡父母者。無明貪愛。卽楞伽第三經云。爾時大慧菩薩白佛言。如世尊說。若男子女人行五無閒業。不入無閒地獄。世尊云。何男子女人行五無閒業。不入無閒地獄。佛告大慧。諦聽諦聽。善思念之。吾爲汝說。大慧白佛言。善哉世尊。唯然受教。佛告大慧。五無閒業。所謂殺父母。及害羅漢。破壞衆僧。惡心出佛身血。大慧云。何衆生母。謂愛更受身。貪喜俱。如緣母立。無明爲父。入處聚落。斷二根本。名害父母。彼諸使不現。如風毒發。究竟斷彼。名害羅漢。云何破僧。謂異相諸陰。和合積聚。究竟斷彼。名爲破僧。大慧不覺外自共相。自心現量。七識身。以三解脫。無漏惡想。究竟斷彼。七識佛。名爲惡心出佛身血。若男子女人行此無閒者。名五無閒事。亦名無閒等。偈言。貪愛名爲母。無明

以爲父。覺境識爲佛。諸使爲羅漢。陰集名爲僧。無閒次第斷。是謂五無閒。不墮無閒獄。釋曰。言如鼠毒發者。西方有鼠。嚙人甚毒。毒在身中。其瘡雖差。忽遇雷聲。其瘡還發。使亦如之。忽遇境界。則還動發。餘可知也。不滅癡愛下。釋一合相義。卽淨名須菩提章。二乘之人。滅癡得明。滅愛則脫。今了一性。故不滅之體。卽明脫。知理無二。卽是契合。合無合相。方是真合。

佛子。此菩薩摩訶薩。隨所積集一切善根。所謂小善根。大善根。廣善根。多善根。無量善根。種種善根。微塵數善根。阿僧祇善根。無邊際善根。不可思議善根。不可量善根。

疏第二佛子下。依徵廣釋中。二。先明迴向。後佛子菩薩摩訶薩修行如是迴向之時下。辨所成益。初中亦二。先辨所迴善根。後佛子菩薩摩訶薩以淨志下。攝將迴向。前中復二。先正修善根。後佛子菩薩摩訶薩於此善下。因修成德。亦可初是行體。後明行用。前中有三十一句。分爲三段。初十一句。明善根分齊。次十善所依緣。後十善根體性。然其前十一。徧從中。中十一。一能生後十。後十一。一容具前十。前十一。一該後二十。思之自顯。鈔然其前十下。料揀言前十一。徧從中。十者從佛境生小等。從法境生小等。從餘八亦然。二。中十一。一能生後十者。從一佛境能生檀等十度。從法生十度。餘八亦然。三。後十一。一容具前十者。謂布施等有小有大。或一或二。或三或四。或具足十。不必皆具。故云容具戒等。九度於前十亦然。四。前十一。一該後二十者。謂從佛境起小施。或從佛境起大施等。或於佛境起小戒。或從佛境起大戒等。理卽昭然。云思之自顯。

疏今初十一句。卽增數十也。於中初三約分量。如小心施。名爲小善。爲菩提施。名之爲大。爲利他施。名

之爲廣餘之九度例此可知。又從佛境所生之施。有此小等。從九境生。亦有小等。如施旣爾。餘九亦然。此三旣爾。下八例知。次三約類。謂有多色類。乃至無量種種不同。未至無量。但可名多。三五相望。亦名種種。餘五約數明多。於中後二。亦顯甚深難思。旁無分量。

佛境界善根。法境界善根。僧境界善根。善知識境界善根。一切衆生境界善根。方便善巧境界善根。修諸善心境界善根。內境界善根。外境界善根。無邊助道法境界善根。

疏二佛境下。中十句內。前五爲緣境。前四智境。後一悲境。後五造修境。初一能修智。次一能修心。次二所觀境。後一所修法。因觀此法。能起十度等。

勤修一切捨善根。立勝志。究竟持淨戒善根。一切捨無不受堪忍善根。常精進心。無退善根。以大方便入無量三昧善根。以智慧善觀察善根。知一切衆生心行差別善根。集無邊功德善根。勤修習菩薩業行善根。普覆育一切世間善根。

疏三勤修下。後十中。前七可知。八願心。積德。九念力。習行。辯力。說法。以爲業行。十由智自在。故能覆育佛子。菩薩摩訶薩。於此善根。修行安住。趣入。攝受。積集。辦具。悟解。心淨。開示。發起時。

疏二因修成德中。二先牒已修。後顯成德。初有十句。初總餘別。一住作意。二加行趣入。三攝行屬已。四漸集成多。五假緣資助。六照其事理。七惑障不生。此上自修。後二轉教。八開顯指示。九勸如說行。隨修一善。則有斯十。

得堪忍心。閉惡趣門。善攝諸根。威儀具足。遠離顛倒。正行圓滿。堪爲一切諸佛法器。能作衆生福德良田。

爲佛所念。長佛善根。住諸佛願。行諸佛業。心得自在。等三世佛。趣佛道場。入如來力。具佛色相。超諸世間。不樂生天。不貪富樂。不著諸行。一切善根。悉以迴向。

疏後得堪忍。下正顯成德。文分爲二。初成自利德。後爲諸衆生下。成利他德。前中十對。皆含因果。一得忍。息惡。二攝根。具戒。三離倒行。正。四上受。下資。五佛護。善增。六住願。起業。七心等。諸佛。行詣道場。八內入佛力。外相超世。九不樂當報。不貪現樂。十不著諸行。而修迴向。此雖有迴向之言。意取所迴之善。十中前八成德。後二離過。九離凡。十離小。

爲諸衆生功德之藏。住究竟道。普覆一切。於虛妄道中。拔出衆生。令其安住。一切善法。徧諸境界。無斷無盡。開一切智善提之門。建立智幢。嚴淨大道。普能示現。一切世間。令除垢染。心善調伏。生如來家。淨佛種性。功德具足。作大福田。爲世所依。安立衆生。咸令清淨。常勤修習。一切善根。

疏後利他中。先總明悲智雙運。爲究竟道。於虛妄下。別顯文。並易知。常勤修下。一句總結。

佛子。菩薩摩訶薩。以淨志願。善提心力。修諸善根時。作是念言。此諸善根。是善提心之所積集。是善提心之所思惟。是善提心之所發起。是善提心之所志樂。是善提心之所增益。皆爲憐愍。一切衆生。皆爲趣求。一切種智。皆爲成就。如來十力。作是念時。善根增進。永不退轉。

疏第二攝將迴向中。二初念修善根本。因法應迴向。後佛子下。正將迴向。今初先經敘念時。次此諸

下。正陳所念。初之五句。總顯諸善。由善提心。多聞積集。思惟義理。發起修行。志樂無厭。唯深唯廣。皆爲下三句。顯善提心。三迴向義。種智證於實際。卽是善提三心。迴向三處也。後作是下結。

佛子。菩薩摩訶薩。復作是念。願我以此善根果報。盡未來劫。修菩薩行。悉以惠施一切衆生。悉以迴向一切衆生。普徧無餘。

疏第二正將迴向中文爲三別。初向衆生。及向善提。二佛子菩薩摩訶薩。如是迴向時。不著業下。明向實際。三佛子菩薩摩訶薩。以此善根普施世間下。總結三種迴向。今初分二。初迴己修善。願成資具。以施衆生。二佛子菩薩摩訶薩。以所集善根於念念下。復回此施願令衆生具足財法。今初亦二。先總顯要期。二願令下別彰施行。今初所以偏願成施行者。一則自具行緣。故云修菩薩行。二則衆生現益。故云惠施一切。三則檀爲行首。舉一例餘。四則此一施行。具一切行。

願令阿僧祇世界珍寶充滿。阿僧祇世界衣服充滿。阿僧祇世界妙香充滿。阿僧祇世界莊嚴具充滿。阿僧祇世界無量摩尼寶充滿。阿僧祇世界妙華充滿。阿僧祇世界上味充滿。阿僧祇世界財貨充滿。阿僧祇世界牀座充滿。蓋以寶帳。敷以妙衣。阿僧祇世界種種莊嚴寶冠充滿。

疏二別彰中。先願成外施。後佛子菩薩摩訶薩。復作是念下。願成內施。以情非情而爲內外。今初分四。一顯施廣大。各僧祇故。

假使一人。盡未來劫。常來求索。以此等物而惠施之。未曾厭倦而有休息。如於一人。於一切衆生。悉亦如是。

疏二假使下。辨施無限。長時多田。隨求無厭故。

佛子。菩薩摩訶薩。如是施時。無虛僞心。無希望心。無名譽心。無中悔心。無熱惱心。但發專求一切智道心。

一切悉捨心。哀愍衆生心。教化成熟心。皆令安住一切智智心。

疏三佛子下。明施殊勝。離過順理。故文有十句。前五離過。追悔不已。則生熱惱。後五順理。前二大智。後三大悲。

佛子。菩薩摩訶薩。以諸善根如是迴向。盡未來劫常行惠施。住一切智智心。

疏四又佛子下。結成二行。謂由迴向行。以成施行。

佛子。菩薩摩訶薩。復作是念。我爲一衆生故。欲令阿僧祇世界寶象充滿。七支具足。性極調順。上立金幢。金網彌覆。種種妙寶。而爲莊嚴。以用布施。願令阿僧祇世界寶馬充滿。如龍馬王。種種衆寶莊嚴之具。而嚴飾之。持用布施。願令阿僧祇世界妓女充滿。悉能敷奏種種妙音。持用布施。願令阿僧祇世界男女充滿。持用布施。願令阿僧祇世界已身充滿。發菩提心。而用布施。願令阿僧祇世界已頭充滿。起不放逸心。而用布施。願令阿僧祇世界已眼充滿。而用布施。願令阿僧祇世界已身血肉及以骨髓充滿。其中心無顧戀。持用布施。願令阿僧祇世界自在王位充滿。其中持用布施。願令阿僧祇世界奴僕作使充滿。其中持用布施。

疏第二內施文四。初對一田顯施廣大。謂一衆生。卽施多事。各僧祇故。

菩薩摩訶薩。以如是等種種諸物。盡未來劫。安住廣大一切施心。施一切衆生。如一衆生。盡衆生界一切衆生。皆如是施。

疏二菩薩下。以一例餘。彰施無限。先舉人例人。

佛子。菩薩摩訶薩。於一世界盡未來劫。修菩薩行。以是等物。施一衆生。如是給施一切衆生。皆令滿足。如於一世界。於盡虛空徧法界。一切世界中。悉亦如是。大悲普覆。終無間息。普加哀愍。隨其所須。供給供養。不令施行遇緣而息。乃至不於一彈指頃。生疲倦心。

疏佛子下。舉處例處。總收其義。有六無限。一物。二時。三心。四田。五施。六處。三大悲下。結成所作。該六無限。一處徧法界。故普覆。二時盡未來。故無息。三田盡生界。而加哀。四施隨所求。而滿足。五物該種種行。不息。六心住大施。而無疲。

佛子。菩薩摩訶薩。如是施時。生於此心。所謂無著心。無縛心。解脫心。大力心。甚深心。善攝心。無執心。無壽者心。善調伏心。不散亂心。不妄計心。具種種實性心。不求果報心。了達一切法心。住大迴向心。善決諸義心。令一切衆生。住無上智心。生大法光明心。入一切智智心。

疏四佛子下。顯施殊勝。離過成德。有二十心。初一牒前起後。後所謂下。正顯一十九心。一不染施行。二不爲施縛。三由遮前二。故得解脫。四遠緣不傾。五詣甚深理。六無相善攝。上六皆巧便殊勝。鈔上六皆巧便殊勝者。通卽七種最勝。成波羅蜜。初會已具。然最勝亦名殊勝。前雖已釋。爲對經文。須知總意。言巧便殊勝者。彼當第五云。要無相智所攝。故上六句。皆無相智。

疏次五清淨殊勝。初句總。總無二執。故下四別。初句無我執。餘三無法執。一不取法相。故二了唯心性。故三見性空。故鈔言次五清淨最殊勝者。彼當第七云。謂要不爲二障間雜。別中一無法執。及了唯心。離所知障。三見性空。無煩惱障。

疏次有三心。卽安住殊勝。初句爲總。菩薩種性。萬行齊修。皆可貴故。二心爲別。無瑕而明故。鈔次有三心。卽安住殊勝者。彼當第一。謂要安住菩薩種性。

疏次有二心。卽迴向殊勝。善決諸義。具三迴向故。鈔次有二心。卽安住殊勝者。迴向彼當第六。謂要迴向無上菩提。今言善決諸義。具三迴向者。決智決悲。決實際故。

疏次有一心。卽意樂殊勝。悲愍一切故。鈔次有一心。卽意樂殊勝者。彼當第三。謂要悲愍一切衆生。疏後之二心。依止殊勝。依菩提心故。初句因。後句果。鈔後之二心。依止殊勝者。彼當第二。謂要依止大菩提心。

疏上顯施中廣大無限。卽事業殊勝。具上七勝。檀度行成。鈔上顯施中卽事業殊勝者。彼當第四。謂要具行一切事業。具上七下。結成前義。故唯識云。要七最勝之所攝受。方可建立波羅蜜多。以上釋經文同符契。

佛子。菩薩摩訶薩。以所集善根。於念念中如是迴向。所謂願一切衆生。財寶豐足。無所乏少。願一切衆生。成就無盡大功德藏。願一切衆生。具足一切安隱快樂。願一切衆生。增長菩薩摩訶薩業。願一切衆生。成滿無量第一勝法。願一切衆生。得不退轉一切智乘。願一切衆生。普見十方一切諸佛。願一切衆生。永離世間諸惑塵垢。願一切衆生。皆得清淨平等之心。願一切衆生。離諸難處。得一切智。

疏第二迴上施行。願令衆生具足財法中。文分爲三。第一慈悲迴向。二又勸衆生下。勸物迴向。三又以諸善如是迴向。下究竟迴向。今初分三。初正明迴向。二佛子菩薩摩訶薩如是迴向時。發歡喜心。下明

迴向所爲。三佛子菩薩摩訶薩。如是悲愍下。結其成益。今初先總標後所謂下。別顯十願。初一豐財。以財施故。餘皆具法。積善本故。文意總顯。

佛子菩薩摩訶薩。如是迴向時發歡喜心。

疏第二迴向所爲中二。先牒前起後。

爲令一切衆生。得利益安樂故。爲令一切衆生。得平等心故。爲令一切衆生。住能捨心故。爲令一切衆生。住一切施心故。爲令一切衆生。住歡喜施心故。爲令一切衆生。住永離貧窮施心故。爲令一切衆生。住一切財寶施心故。爲令一切衆生。住無數財寶施心故。爲令一切衆生。住普施無量施一切施心故。爲令一切衆生。住盡未來劫無斷施心故。無令一切衆生。住一切悉捨無悔無惱施心故。爲令一切衆生。住悉捨一切資生之物施心故。爲令一切衆生。住隨順施心故。爲令一切衆生。住攝取施心故。爲令一切衆生。住廣大施心故。爲令一切衆生。住捨無量莊嚴具供養施心故。爲令一切衆生。住無著施心故。爲令一切衆生。住平等施心故。爲令一切衆生。住如金剛極大力布施心故。爲令一切衆生。住如日光明施心故。爲令一切衆生。住攝如來智施心故。

疏後爲令下。隨義別顯。總有一百一十句。文分爲二。前七十二句。令成行布。修因至果。後三十八句。令成圓融。因圓果滿。此二無礙。爲迴向意。亦是前自分後勝進。前中六。初二十一。句。爲令修善趣賢首位之行。然純明施行。末云攝如來智施行者。照三輪空。離諸分別。同菩提故。鈔善趣賢首位之行者。圓融十信位也。

爲令一切衆生。善根眷屬具足故。爲令一切衆生。善根智慧常現在前故。爲令一切衆生。得不可壞淨心。圓滿故。爲令一切衆生。成就最勝清淨善根故。爲令一切衆生。於煩惱睡眠中得覺悟故。爲令一切衆生。滅除一切諸疑惑故。爲令一切衆生。得平等智慧淨功德故。爲令一切衆生。功德圓滿無能壞者故。爲令一切衆生。具足清淨不動三昧故。爲令一切衆生。住不可壞一切智智故。

疏二爲令一切善根下十句。成種性位中修行。鈔種性卽十住。

爲令一切衆生。成滿菩薩無量清淨神通行故。爲令一切衆生。修集無著善根故。爲令一切衆生。念去來今一切諸佛心清淨故。爲令一切衆生。出生清淨勝善根故。爲令一切衆生。滅除一切魔所作業障道法故。爲令一切衆生。具足無礙清淨平等功德法故。爲令一切衆生。以廣大心常念諸佛無懈廢故。爲令一切衆生。常近諸佛勤供養故。爲令一切衆生。廣開一切諸善根門。普能圓滿白淨法故。爲令一切衆生。無量心廣大心最勝心悉清淨故。

疏三有十句。令成解行位中修行。第十云無量者。四等也。鈔解行雖通三賢。今正取行向二位故。故解行發心。在於十行。方發迴向心故。

爲令一切衆生。成就清淨等施心故。爲令一切衆生。奉持諸佛尸波羅蜜等清淨故。爲令一切衆生。得大堪忍波羅蜜故。爲令一切衆生。住精進波羅蜜常無懈故。爲令一切衆生。住無量定能起種種神通智故。爲令一切衆生。得知一切法無體性般若波羅蜜故。爲令一切衆生。圓滿無邊淨法界故。爲令一切衆生。成滿一切神通清淨善根故。爲令一切衆生。住平等行積集善法。悉圓滿故。爲令一切衆生。善入一切諸

佛境界悉周徧故。

疏四從成就清淨等施心下。令成十地位中修十度行。七云滿無邊淨法界。此通事理。故曰無邊。是方便度也。八成滿神通。卽是大願。九住平等。方可名力。十入佛境。是謂智圓。

爲令一切衆生。身口意業普清淨故。爲令一切衆生。善業果報普清淨故。爲令一切衆生。了達諸法普清淨故。爲令一切衆生。了達實義普清淨故。爲令一切衆生。修諸勝行普清淨故。爲令一切衆生。成就一切菩薩大願普清淨故。爲令一切衆生。證得一切功德智慧普清淨故。爲令一切衆生。成就一切同體善根。迴向出生一切智乘普圓滿故。爲令一切衆生。嚴淨一切諸佛國土普圓滿故。爲令一切衆生。見一切佛而無所著普圓滿故。

疏五有十句。令成等覺位中修行。故皆有普言。

爲令一切衆生。具諸相好功德莊嚴普圓滿故。爲令一切衆生。得六十種音聲發言誠諦。皆可信受。百千種法。而以莊嚴。如來無礙功德妙音。悉圓滿故。爲令一切衆生。成就十力莊嚴無礙平等心故。爲令一切衆生。得一切佛無盡法明。一切辯才。普圓滿故。爲令一切衆生。得無上無畏。人中之雄師子吼故。爲令一切衆生。得一切智轉不退轉。無盡法輪故。爲令一切衆生。了一切法。開示演說。普圓滿故。爲令一切衆生。以時修習清淨善法。普圓滿故。爲令一切衆生。成就導師無上法寶等清淨故。爲令一切衆生。於一莊嚴無量莊嚴大莊嚴諸佛莊嚴普圓滿故。爲令一切衆生。等入三世所有境界。悉周徧故。

疏六從具諸相好下。有十一句。令成佛果位中行。言六十種音者。第十迴向有而不具。至文當知。密迹

力士經第二具說。莊嚴論亦引此經。而云百千種法。而以莊嚴者。不思議法品云。如來具足六十種音聲。一一音有五百分。一分有無量百千清淨之音。以爲嚴好。卽其事也。復有處說六十四音。以聲有八轉。謂體業具爲從屬於呼。是八轉聲。各具八德。所謂調和聲。柔輭聲。諦了聲。易解聲。無錯謬聲。無雌小聲。廣大聲。深遠聲。八八則有六十四種。鈔密迹力士經者。亦至第十迴向明之。莊嚴論亦引此經者。論當第六偈云。菩薩自成就。如前義應知。聲有六十種。是說如來事。長行釋中具引佛祕密經。佛祕密經卽密迹經耳。並至下明。復有處說者。瑜伽等說八轉者。疏文但舉唐言之名。今兼顯梵音。西域國法。若欲尋讀內外典籍。要解聲論。此八轉聲。方知文義分齊。一補盧沙。此是直指陳聲。如人斫樹指說其人。卽令體聲。二補盧衫。是所作業聲。如所作斫樹。故云業也。三補盧崽拏。是能作具聲。如由斧破。故云具也。四補盧沙耶。是所爲聲。如爲人斫。故云爲也。五補盧沙頌。了可反。是所從聲。如因人造舍等。故云從也。從卽所因。故六補盧殺婆。是所屬聲。如奴屬主。故云屬也。七補盧鍛。所戒反。是所於聲。如客依主。故云於也。於卽依義。瑜伽第二名上七種。爲七例句。以是起解大例。故唯有梵語聲論八轉。更加醯補盧沙。是呼召之聲。故云呼也。然此八聲。各有三種。一男聲。二女聲。三非男非女聲。此上且約男聲說之。以梵名丈夫爲盧沙也。是八轉聲者。卽八梵音。賢首品已明。今當重說。一調和者。謂大小得中。故二柔輭者。言無羸獷。故三諦了者。亦云最好。如伽陵頻伽等。故四易解者。亦云易了。言詞辯了。故五無錯謬者。亦云不誤。言無錯誤。故六無雌小者。亦云不女。其聲雄朗。故七廣大者。亦云尊慧。言無戰懼。故八深遠者。臍輪發生。故如來具此八八之音。

疏四云無盡法明者。第八地云。如來法明有無量轉等。第十云。一莊嚴者。無二相故。以一莊嚴嚴一切。故無量莊嚴者。衆多差別故。大莊嚴者。稱法界故。若依若正皆具此嚴。

爲令一切衆生。悉能往詣一切佛刹。聽受正法。無不徧故。爲令一切衆生。智慧利益爲世所宗。與佛等故。爲令一切衆生。以一切智。知一切法。普圓滿故。爲令一切衆生。行不動業。得無礙果。普圓滿故。爲令一切衆生。所有諸根。咸得神通。能知一切衆生根故。爲令一切衆生。得無差別平等智慧。於一相法。普清淨故。爲令一切衆生。與理無違。一切善根。悉具足故。爲令一切衆生。於一切菩薩。自在神通。悉明達故。爲令一切衆生。得一切佛無盡功德。若福若智。悉平等故。爲令一切衆生。發菩提心。解一切法。平等一相。無遺缺故。

疏第二悉能往詣下。三十八句。明圓融行。因圓果滿。明位位中有佛義故。若將此下屬前佛果。則令果中有修菩薩行。遇善知識。便達正理。文分爲四。初十句。令衆生於種性位。因行圓滿。四云。行不動業。得無礙果者。毀譽不動。則觸境無礙。有云。其因有四。一就機法施。二無障礙願。三悲心亡己。爲物受生。四修法性。鎔融行。感三業皆無功用。盡衆生界。同時普應。無所障礙。鈔若將此下屬前佛果下。會異釋。卽刊定記釋。二段皆屬於佛果故。今明修菩薩行及近善友。非屬佛耳。

爲令一切衆生。了達正法。爲世最上福德田故。爲令一切衆生。成就平等清淨大悲。爲諸施者大力田故。爲令一切衆生。堅固第一無能沮壞故。爲令一切衆生。見必蒙益。無能摧伏故。爲令一切衆生。成滿最勝平等心故。爲令一切衆生。善能了達一切諸法。得大無畏故。爲令一切衆生。放一光明。普照十方一切世

界故。爲令一切衆生。普修一切菩薩精進。行無懈退故。爲令一切衆生。以一行願普滿。一切諸行願故。爲令一切衆生。以一妙音。普使聞者。皆得解放。

疏二從了達正法下十句。令解行位中。因圓果滿。二云大力田者。謂於其中。種少善根。能壞大惑故。三云堅固第一者。悲智大願。無能壞故。

爲令一切衆生。悉能具足一切菩薩清淨心故。爲令一切衆生。普得值遇諸善知識。咸承事故。爲令一切衆生。修菩薩行。調伏衆生。不休息故。爲令一切衆生。以妙辯才。具一切音。隨機廣演。無斷盡故。爲令一切衆生。能以一心。知一切心。以一切善根等。迴向故。爲令一切衆生。常樂積集一切善根。安立衆生於淨智故。爲令一切衆生。得一切智。福德智慧清淨身故。爲令一切衆生。善知一切衆生善根。觀察迴向普成就故。

疏三從悉能具足一切菩薩清淨心下八句。令十地位中。因行圓滿。晉經第一。名直心平等。卽初證真。如此約離障。故云清淨。二云見善知識。生大歡喜。正順初地。得見多佛。故云咸事。

爲令一切衆生。得一切智成等正覺。普圓滿故。爲令一切衆生。得具足神通智。於一處出興。一切諸處。皆出興故。爲令一切衆生。得普莊嚴。智嚴淨。一衆會。一切衆會。皆嚴淨故。爲令一切衆生。於一佛國土。普見一切佛國土故。爲令一切衆生。以一切莊嚴具。不可說莊嚴具。無量莊嚴具。無盡莊嚴具。莊嚴一切諸佛國土。普徧故。爲令一切衆生。於一切法。悉能決了。甚深義故。爲令一切衆生。得諸如來。最上第一自在神通故。爲令一切衆生。得非一非異。一切功德。自在神通故。爲令一切衆生。具足一切平等善根。普爲諸

佛灌其頂故。爲令一切衆生。悉得成滿清淨智身。於諸有中。最尊勝故。

疏四從令得一切智成等正覺下十句。令成佛果圓滿。八云非一非異等者。卽十通中無體性無作神通。以了一切爲無爲等。非一異故。於一切染淨自他等境。轉變自在。相卽相作。而非一異。業用無礙。又非一異。應成四句。如十忍品說。鈔八云非一者。標示也。故彼通中廣說非一異義。以了一切下出非一異是神通相。若一向非一。各互相礙。不能相作。若一向非異。無二可得。將何相作。以非異故。一理融通。非一事故。得相作等。又非一異者。一非一二非異。三非非一非非異。四非亦一亦異。十忍當說。疏然上諸義。望一一位。各有所由。恐厭繁文。舉其大略耳。又行布圓融無礙。不可定執。

佛子。菩薩摩訶薩。如是悲愍利益安樂一切衆生。

疏第三結其成益中二。先結前生後。

大方廣佛華嚴經疏鈔會本卷九十三

咸令清淨。遠離慳嫉。受勝妙樂。具大威德。生大信解。永離瞋恚。及諸翳濁。其心清淨。質直柔軟。無有諂曲。迷惑愚癡。行出離行。堅固不壞。平等之心。永無退轉。白淨法力。具足成就。無惱無失。善巧迴向。常修正行。調伏衆生。滅除一切諸不善業。修行苦行一切善根。

疏後咸令下別顯益相。文有十三句。顯二種生。攝一切德。初之三句。顯勝妙生。二句爲因。一句爲果。清淨者。戒受人天身。離慳者。施有大財位。人天財位。卽勝妙生。有大威德。後之十句。顯功德生。功德生者。卽決定勝道。有人天中具大財位。無信解等。非功德生。一生大信解。揀異邪小。二永離三毒障。翳卽癡濁。卽是貪。亦兼餘障。故致諸言。三其心下。卽離毒之德。初句爲總。質直下別。由離瞋故。質直柔軟。由離貪故。無有諂曲。由離癡翳故。無有迷惑愚癡。四修真定。慧爲出離道。五運同體。悲爲平等心。六入無漏。因爲白淨法。七由離前過。不惱衆生。自行無失。兼能迴向。八自他兼利。九滅除惡因。十修行善本。鈔初之三句者。卽前十度章中。引唯識釋前三爲增上生道。感大財體及眷屬故。其勝妙生。卽增上生。名異義同。後三決定勝道。

又勸衆生。令其修習。普爲合識。具受衆苦。以大智眼。觀諸善根。知其悉以智慧爲性。方便迴向一切衆生。疏第二勸物迴向中。二先令悲智雙行而成迴向。

爲令一切衆生。悉得安住一切清淨功德處故。爲令一切衆生。悉能攝受一切善根。知諸功德性及義故。

爲令一切衆生。普淨一切諸善根故。爲令一切衆生。於福田境界中。種諸善法。心無悔故。爲令一切衆生。普能攝受一切衆生。一一皆令趣一切智故。爲令一切衆生。普攝一切所有善根。一一皆與平等迴向而相應故。

疏後爲令下。明迴向意。意通能所。約能菩薩。爲此故教。約所教。其當如是爲。文有六句。二中性卽體性。義卽所以通於理事。

又以諸善根如是迴向。所謂願一切衆生。究竟安隱。願一切衆生。究竟清淨。願一切衆生。究竟安樂。願一切衆生。究竟解脫。願一切衆生。究竟平等。願一切衆生。究竟了達。願一切衆生。究竟安住。諸白淨法。願一切衆生。得無礙眼。願一切衆生。善調其心。願一切衆生。具足十力。調伏衆生。

疏第三又以下。究竟迴向。上來展轉迴向。以隨宜故。或通因果。世及出世。今迴向旣終。惟願得成究竟之果。安隱者。無障惱故。安樂者。唯寂滅故。

佛子。菩薩摩訶薩如是迴向時。不著業。不著報。不著身。不著物。不著刹。不著方。不著衆生。不著無衆生。不著一切法。不著無一切法。

疏第二迴向實際中。先牒前隨相。後不著下。正顯離相。十句五對。一己業因果。二自己身財。三起行方便。四所化衆生。五所迴行法。亦通一切。不著一切法者。了法空故。不著無一切者。空亦空故。

佛子。菩薩摩訶薩如是迴向時。以此善根。普施世閒。願一切衆生。成滿佛智。得清淨心。智慧明了。內心寂靜。外緣不動。增長成就三世佛種。

疏第三佛子已下。總結三種迴向。近仍前起。謂卽上離相不礙隨相。遠結上文。普施世間。卽向衆生。願生成佛。卽向菩提。得清淨心下。卽向實際。成就三世佛種。卽總結三種迴向之能。

佛子菩薩摩訶薩。修行如是迴向之時。超出一切無能過者。一切世間所有言詞。悉共稱讚。亦不可盡。普修一切菩薩諸行。悉能往詣一切佛土。普見諸佛。無所障礙。又能普見一切世界菩薩所行。以善方便。爲諸衆生。分別諸法甚深句義。得陀羅尼。演說妙法。盡未來劫。無有斷絕。爲衆生故。念念於不可說不可說世界。猶如影像。普現其身。供養諸佛。念念嚴淨。不可說不可說諸佛國土。悉令周徧。修行嚴淨佛刹智慧。而無厭足。念念令不可說不可說百千億那由他衆生。清淨成就平等滿足。於彼一切諸國土中。勤修一切諸波羅蜜。攝取衆生。成就淨業。得無礙耳。於不可說不可說諸佛世界。一一如來所轉法輪。聽聞受持。精勤修習。不生一念捨離之心。住無所得。無依止。無作無著。菩薩神通。於一刹那。一彈指頃。分身普詣。不可說諸佛世界。與諸菩薩等同一見。

疏大文第二迴向成益。卽此行所成廣大之德。有四佛子。卽爲四段。第一佛子成因位廣大德。第二佛子果位清淨德。三會遠自在德。四相盡平等德。前之二段。卽隨相益。後之二段。卽離相益。又初一現成德。次一當成德。此二因果一對。三是會相德。四是得實德。此二會違攝法對。今初先牒成益之時。顯正修時。卽成此益。後超出下。正顯。顯有十二句。初二爲總。初句顯深。無能過故。後句顯廣。歎不盡故。後十句別攝爲五對。初二所行所見對。行中初行行後詣刹所見。中初見果。後見因。二說法深廣對。事理善巧。故法義甚深。總持廣包。辭辯無斷。三爲衆生下。現身嚴刹對。於嚴刹中。先果後因。四念念令下。成

就攝生對初成就。後於彼下攝取。五得無礙下。遠聽速往對。初明遠聽。聽必修行。後住無得下。速往。往皆無得。不假靜慮。故曰無依。不起加行。故云無作。不染通境。故云無著。依此無依。故能刹那頓現。等同。一見者。詣刹雖多。道風無異。

佛子。菩薩摩訶薩。如是修習菩薩行時。尚能成滿無量不可說不可說清淨功德。憶念稱讚所不能盡。況復得成無上菩提。

疏第二果德清淨。文分爲二。一牒現況當。謂結前因德。尚爾無盡。況當成果德。豈可量耶。

一切佛刹平等清淨。一切衆生平等清淨。一切身平等清淨。一切根平等清淨。一切業果平等清淨。一切衆會道場平等清淨。一切圓滿行平等清淨。一切法方便智平等清淨。一切如來諸願迴向平等清淨。一切諸佛神通境界平等清淨。

疏二一切佛刹下。懸解當相。謂成果之狀。略舉此十。前六果相圓備。後四舉因顯果。謂此果滿。由因圓故。皆言清淨者。無染不盡云平等者。無理不證。染淨皆虛。故云平等。淨符乎理。但云清淨。此上因果德用。若非圓教諸位相攝。何容地前得斯無礙。

佛子。菩薩摩訶薩。如是迴向時。得一切功德清淨歡喜法門。無量功德圓滿莊嚴。

疏第三會遠自在德中。二初結前生後。此結有二。一近結上果德。果德無邊。上言不盡。故云一切功德清淨。二通結因果。以隨相益竟。欲明得隨相益。卽有離相故。總結云。得一切功德。乃至圓滿莊嚴。由此故有不違等也。

如是迴向時。衆生不違一切刹。刹不違一切衆生。刹衆生不違業。業不違刹衆生。思不違心。心不違思。思不違境界。境界不違思。心業不違報。報不違業。業不違業道。業道不違業。

疏二如是迴向時。下正顯會違之益。有十五對。大分爲四。初十一對。法法相望無違。次二對。世世無違。次一對。世法無違。後一因果無違。卽是總結。前中分三。初六對。事事無違。次法性下二對。事理無違。三刹平等下三對。理理無違。

疏今初一依正。二業果。三王所。四心境。五業報。二是引業。此是滿業。六正助無違。行前之思。方便造業。但名爲業。思之所起身口意行。名爲業道。以是思之所游履故。晉經名業迹。迹卽道也。此之事事所以無違者。隨性融故。緣起相由故。同一緣起義故。亦由後二段。令此無違。鈔六正助無違者。卽經業道不違業。業不違業道。俱舍業品云。俱得名尸羅。一妙行。二業。三律儀。四唯初表無表名別解脫。五業道。六釋曰。此有六名。今此卽當第六。彼疏釋云。又此初念。亦名業道。第六名也。本求戒思。今日究竟。依業暢義。立業道名。謂戒前之思。名之爲業。初念戒體。名之爲道。思所履故。業家之道。故名業道。故初刹那名別解脫。初棄惡故。亦得名爲別解脫律儀。能防非故。亦得名爲根本業道。暢思起故。第二念等。不名業道。非暢思故。名爲後起。根本後故。今疏全依俱舍論文。故不更引古來異釋。此之事事下。出事事無違之因。略出三因。一法性融通門。二緣起相由門。上二卽事事無礙義。三直語同一緣起。通事通理。非無礙義。如觀一葉落。知天下秋矣。亦由後二者。後二卽事理無違。及理理無違。由此故。令事事無違。謂旣同一味。事復卽理。由事卽理。理融於事。事故得事事無礙。故無違也。

法性不違相。法相不違性。法生不違性。法性不違生。

疏次二對理事無違者。初對約所相之法。論性相無違。後對約能相四相辨性相無違。略舉一生耳。性不違相者。理能成事故。相不違性者。事能顯理故。不動真際。建立諸法故。不壞假名。說實相故。

刹平等不違衆生平等。衆生平等不違刹平等。一切衆生平等。不違一切法平等。一切法平等。不違一切衆生平等。離欲際平等。不違一切衆生安住平等。一切衆生安住平等。不違離欲際平等。

疏三理理無違三對一依正。二人法。三能所證。離欲際。卽所證理。衆生安住。卽能證智。智冥於理。故二無違。

疏然上三段無違。初後二段。唯約異類相望。由後段中以事取理。有多平等故。中間事理無違。則有二義。一自類相望。如刹望刹平等。二異類相望。如刹望衆生平等。平等卽無性之理也。鈔然上三段下重總料揀於中有二。一同異類料揀。

疏開此則有四句。若細論則有五重四句。第一四句者。一刹二衆生。三刹無性理。四衆生無性理。此四爲本。第二四者。一刹卽刹無姓。以事不存故。二不卽以不壞事故。三無性卽刹。以不守自性故。四不卽刹。以性不變故。第三四者。衆生與無性亦同刹說。上二四句。各初及第三。是第二段性相無違。中自類相望。各二及四。雖非無礙。亦不相違。義如上說。第四四者。一刹無性。卽衆生無性。以無二故。二不卽以無可卽故。三刹卽衆生。以無性是衆生。刹旣無性。卽衆生故。四刹不卽衆生。以不礙兩存故。此中初二句。是第三段理理無違。以無可卽亦無可違故。第三句。是第一段。事事無違。第四句。雖非無礙。亦不相

違第五四句者。一刹卽衆生無性。二不卽。三衆生卽刹無性。四不卽。此中初及第三句。是第二段。理事無違中。異類事理相望。二四兩句。雖不壞性相。亦不相違。然爲門不同。有多差別。理實諸句。無不融通。鈔二開此。則有下句。數料揀。但就刹衆生。以成諸句。初根本四句。二刹上理事成四句。三約衆生上。理事成四句。上二。三。兩四句。但是事理無礙。四以刹事對生理爲四。五以衆生事望刹理成四。此後二。四方成事事無礙。上二等者。以事理相望。唯就同類卽得成。故言各二及四。雖非無礙。亦不相違。義如上說者。以二四皆是不卽。故非無礙。亦不相違者。由上同一緣起。故由不壞之事不變之性。皆同一緣起。故此中初二句。是理理無違者。一刹無性卽衆生無性。二理同故。以無可卽亦無可違者。釋第二句。是理理無違義。第四句者。第四不礙兩存。故非無礙。而亦同是一緣起。故及第五四句中。亦不相違。皆同前二三四句中。亦不相違。此中初及第三句。是異類事理相望者。以將刹望衆生無性。衆生與刹是異類也。

過去不違未來。未來不違過去。過去未來不違現在。現在不違過去未來。

疏二約世世。

世平等不違佛平等。佛平等不違世平等。

疏三約世法。

菩薩行不違一切智。一切智不違菩薩行。

疏四約因果。文並可知。

佛子。菩薩摩訶薩。如是迴向時。得業平等。得報平等。得身平等。得方便平等。得願平等。得一切衆生平等。得一切刹平等。得一切行平等。得一切智平等。得三世諸佛平等。

疏第四相盡平等德。文分爲二。初得平等離相益。

得承事一切諸佛。得供養一切菩薩。得種一切善根。得滿一切大願。得教化一切衆生。得了知一切業。得承事供養一切善知識。得入一切清淨衆會道場。得通達一切正教。得成滿一切白法。

疏二得承事一切佛下。明得不壞諸相益。

佛子是爲菩薩摩訶薩第七等隨順一切衆生迴向。

疏第三依釋結名可知。

菩薩摩訶薩成就此迴向。則能摧滅一切魔怨。拔諸欲刺。得出離樂住。無二性。具大威德。救護衆生。爲功德王。神足無礙。往一切刹。入寂滅處。具一切身。成菩薩行。於諸行願心得自在。分別了知一切諸法。悉能徧生一切佛刹。得無礙耳。聞一切刹所有音聲。得淨慧眼。見一切佛未嘗暫捨。於一切境界。成就善根。心無高下。於一切法。得無所得。菩薩摩訶薩。以一切善根等隨順一切衆生。如是迴向。

疏大文第二辨位果與益異者。成益約於位中。得果就其位滿。有二十一句。初一牒前後一總結。中間十九攝爲九果。一斷染果。降魔冤。謂止惡緣。拔欲刺。斷惡因也。二入證果。得出離樂。正證住。無二性。證因。三益生果。具大威德。卽護生之因。四內外超勝果。謂內德外用。五往一切下。寂用無礙果。六具一切下行願廣大果。七分別下。智通殊勝果。八得無礙下。見聞自在果。九於一切境下。修行具足果。初成就。

後無得。

爾時金剛幢菩薩承佛神力普觀十方而說頌言。

菩薩所作諸功德微妙廣大甚深遠。

疏第二重頌二十一偈分三初十一偈頌迴向次九偈頌成益後一偈結讚。今初分二初半偈頌所迴善根。

乃至一念而修行悉能迴向無邊際。

菩薩所有資生具種種豐盈無限億香象寶馬以駕車衣服珍財悉殊妙。或以頭目并手足或持身肉及骨髓悉徧十方無量刹普施一切令充徧。無量劫中所修習一切功德盡迴向爲欲救度諸羣生其心畢竟不退轉。

疏餘頌攝將迴向於中初三偈半頌迴已修善願成資具以施衆生。菩薩爲度衆生故常修最勝迴向業普令三界得安樂悉使常成無上果。菩薩普興平等願隨其所集清淨業悉以迴施諸羣生如是大誓終無捨。菩薩願力無限礙一切世間咸攝受如是迴向諸羣生未曾暫起分別心。普願衆生智明了布施持戒悉清淨精進修行不懈廢如是大誓無休息。菩薩迴向到彼岸普開清淨妙法門智慧同於兩足尊分別實義得究竟。疏次菩薩爲度下五偈頌復迴此施願令衆生具足財法。

菩薩言詞已通達。種種智慧亦如是。說法如理無障礙。而於其中心不著。常於諸法不作二。亦復不作於不二。於二不二並皆離。知其悉是語言道。疏三菩薩言詞下二偈頌迴向實際。

知諸世間悉平等。莫非心語一切業。衆生幻化無有實。所有果報從茲起。一切世間之所有。種種果報各不同。莫不皆由業力成。若滅於業彼皆盡。疏二知諸世間下頌成益中三初二頌因德廣大。

菩薩觀察諸世間。身口意業悉平等。亦令衆生住平等。猶如無等大聖尊。菩薩善業悉迴向。普令衆生色清淨。福德方便皆具足。同於無上調御士。菩薩利益諸羣生。功德大海盡迴向。願使威光特超世。得成勇猛大力身。凡所修習諸功德。願使世間普清淨。諸佛清淨無倫匹。衆生清淨亦如是。菩薩於義得善巧。能知諸佛最勝法。以衆善業等迴向。願令庶品同如來。疏次五頌果德清淨。

菩薩了知諸法空。一切世間無所有。無有造作及作者。衆生業報亦不失。諸法寂滅非寂滅。遠離此二分別心。知諸分別是世見。入於正位分別盡。疏後二頌相盡平等。略不頌會違上已委具。然頌三段。勢少異前。前直語益。今兼顯迴向之因。如是真實諸佛子。從於如來法化生。彼能如是善迴向。世間疑惑悉除滅。

大方廣佛華嚴經疏鈔會本卷九十四

佛子。何者是菩薩摩訶薩真如相迴向。

疏第八真如相迴向。長行中二。先廣明。後結示。前中亦二。先明位行。後辨位果。前中亦三。今初標名。善根合以成迴向。從所依立名。義通能所故。本業云。常照有無二諦。一切法一合相故。若梵本中。具名真如。相自性迴向。相卽德相。性卽體性。以二非卽離。所以雙舉。多說德相。唐本單名。卽以法界印而爲其性。此與前後異者。謂第七明會事向理。故云平等。此明事盡理現。故行等同如。第九明從體起用。第十明用同體。同體而用。餘如第四迴向會釋。鈔從所依立名者。但言真如相。卽是所依。善根合如故。義通能所。常照者。以有能所。況一合相。復有二義。一有無不二。卽一合相。以同如故。二智與境冥。絕能所故。卽通能所爲如相矣。卽以法界下。四出體。能所契合。爲法界故。此與前後下。五揀濫。前卽第七。以平等隨順衆生故。後卽九十九。卽離於能所縛著故。十入法界。亦契合故。故其四名。多分相濫。疏揀可知。餘如第四迴向者。彼以善根如於實際。故至一切處。前對此揀竟。故今不對第四揀之。

佛子。此菩薩摩訶薩。正念明了。其心堅住。遠離迷惑。專意修行。深心不動。成不壞業。趣一切智。終不退轉。志求大乘。勇猛無畏。植諸德本。普安世間。生勝善根。修白淨法。大悲增長。心寶成就。常念諸佛。護持正法。於菩薩道。信樂堅固。

疏第二依徵廣釋中三。初明隨相迴向。二佛子菩薩摩訶薩。以此善根下。離相迴向。三佛子此菩薩摩

訶薩如是迴向時得一切下。迴向成益。初中分二。先積善迴向。後佛子菩薩摩訶薩若見下。觸境迴向。前中亦二。先明所迴行體。後菩薩爾時慧眼下。攝將迴向。前中亦二。先積集資糧。後成就無量下。結德成就。今初文有十句。初一爲總。謂正念堅明。下九爲別。文有三節。初三正念菩提。一遠離迷惑。是明了義。專意修行。卽爲正念。正念是定。明了是慧。定慧雙運。爲道之源。二契理不動。故曰深心。緣不能沮。成不壞業。卽自分堅住。三求佛不退。卽勝進堅住。次四句正念化生。初句爲總。勇求兼濟。爲大法故。下三句別。一悲智雙運。爲明了。般若爲衆德之本故。二進善去漏。爲正念。三悲增智圓。爲堅住。後三正念三寶。一念佛。二護法。三信僧。上有正念。下句堅固。影略該攝。

成就無量淨妙善根。勤修一切功德智慧。爲調御師。生衆善法。以智方便。而爲迴向。

疏二結德成就。文有四句。前三結前。一非止上十。故云無量。二三統而收之。不出福智大悲。末句生後迴向。

菩薩爾時慧眼普觀。所有善根無量無邊。

疏第二攝將迴向中。二先觀察善根。本期迴向。二以諸善根下。正明迴向。今初有三。初總標。其諸善根。修集之時。若求緣。若辨具。若淨治。若趣入。若專勵。若起行。若明達。若精審。若開示。

疏次其諸善下別顯。

如是一切有種種門。種種境。種種相。種種事。種種分。種種行。種種名字。種種分別。種種出生。種種修習。疏三如是下總結於中。二先結種類多門有十句。謂隨前求緣等。有多差別。一通游非一故。如一趣入。

爲用有門。爲用空門。乃至無量。故慈行童女云。諸佛各以異門。令我入此普莊嚴門。二隨其一門。緣何爲境。爲佛爲法等。三隨一境上相貌不同。四相所依事。謂色心等。五隨一事上有多分位。六施等萬行。七能詮名字。八分別決澤。九生多知見。十若定若慧。上中下修。

其中所有一切善根。悉是趣向十力乘心之所建立。皆悉迴向一切種智。唯一無二。疏後其中下結修本意。本意既然。寧不迴向。

以諸善根如是迴向。所謂願得圓滿無礙身業修菩薩行。願得清淨無礙口業修菩薩行。願得成就無礙意業安住大乘。願得圓滿無障礙心淨修一切諸菩薩行。願起無量廣大施心。周給無邊一切衆生。願於諸法心得自在。演大法明。無能障礙。願得明達一切智處。發菩提心。普照世間。願常正念三世諸佛。諦想如來常現在前。願住圓滿增上志樂。遠離一切諸魔怨敵。願得安住佛十力智。普攝衆生。無有休息。

疏第二正明迴向分二。初向善提。二佛子菩薩摩訶薩如爲己身下迴向衆生。前中有二十願分三。初十願願成智行。卽菩提因果。

願得三昧遊諸世界。而於世間無所染著。願住諸世界。無有疲厭。教化衆生。恆不休息。願起無量思慧。方便成就菩薩不思議道。願得諸方不迷惑智。悉能分別一切世間。

疏二得三昧下。四願周徧利生。卽化用因果。一化所依。二化時處。三知藥治。四識病宜。

願得自在神通智力。於一念中。悉能嚴淨一切國土。願得普入諸法自性。見一切世間。悉皆清淨。願得生起無差別智。於一刹中。入一切刹。願以一切刹莊嚴之事。顯示一切教化無量無邊衆生。願於一佛刹中。

示無邊法界一切佛刹。悉亦如是。願得自在大神通智。普能往詣一切佛土。

疏三得自在下六願。普嚴佛刹。卽淨土因果。一神通智嚴淨事土。二入理智嚴法性土。亦非嚴嚴故。三事理無礙智嚴帝網土。四以前三嚴。用化衆生。上四因圓。後二果滿。

佛子。菩薩摩訶薩。以諸善根。願得莊嚴一切佛國。願得周徧一切世界。願得成就智慧觀察。如爲己身如是迴向。如是而爲一切衆生。

疏第二迴向衆生文三。初牒前起後。卽從後倒牒前之三段。

所謂願一切衆生。永離一切地獄畜生閻羅王趣。願一切衆生。除滅一切障礙之業。願一切衆生。得周普心平等智慧。願一切衆生。於怨於親等心。攝受皆令安樂。智慧清淨。願一切衆生。智慧圓滿。淨光普照。願一切衆生。思慧成滿了真實義。願一切衆生。以淨志樂。趣求菩提。獲無量智。願一切衆生。普能顯示安隱住處。

疏二所謂下。正顯迴向。文有八句。初二願離三障。障礙之言。義兼煩惱。次四成四智。後二結二果。謂菩提涅槃。菩提不唯四智。故云無量。

佛子。菩薩摩訶薩。恆以善心。如是迴向。爲令一切衆生。遇清涼雲。注法雨。故爲令一切衆生。常值福田勝境界。故爲令一切衆生。皆能善入菩提心藏。自護持。故爲令一切衆生。離諸蓋纏。善安住。故爲令一切衆生。皆獲無礙神通智。故爲令一切衆生。得自在身。普示現。故爲令一切衆生。成就最勝一切種智。普興利益。無空過。故爲令一切衆生。普攝羣品。令清淨。故爲令一切衆生。皆能究竟一切智。故爲令一切衆生。心

不動搖無障礙故。

疏三佛子下總結所爲。

佛子菩薩摩訶薩。見可愛樂國土園林。草木華果。名香上服。珍寶財物。諸莊嚴具。或見可樂村邑聚落。或見帝王威德自在。或見住處離諸諠雜。見是事已。以方便智精勤修習。出生無量勝妙功德。爲諸衆生。勤求善法。心無放逸。廣集衆善。猶如大海。以無盡善。普覆一切。爲衆善法所依之處。以諸善根方便迴向。而無分別。開示無量種種善根。智常觀察一切衆生。心恆憶念善根境界。以等真如平等善根。迴向衆生。無有休息。

疏第二觸境迴向。大同淨行對境發願。於中五。一列所見境。二見是事下。觀境成德。謂增悲智。三以諸善根下。總明迴向。亦是迴向之德。四菩薩爾時下。別明迴向。五佛子下。迴向成益。前三可知。

菩薩爾時以諸善根如是迴向。所謂願一切衆生得諸如來可愛樂見。見法真性平等平等。無所取著。圓滿清淨。願一切衆生見諸如來甚可愛樂。圓滿供養。願一切衆生往生一切無諸煩惱。甚可愛樂。清淨佛刹。願一切衆生得見諸佛可愛樂法。願一切衆生常樂護持一切菩薩可愛樂行。願一切衆生得善知識。可愛樂眼見無所礙。願一切衆生常見一切可愛樂物。無有違逆。願一切衆生證得一切可愛樂法。而勤護持。願一切衆生於一切佛可愛樂法中得淨光明。願一切衆生修諸菩薩一切能捨可愛樂心。願一切衆生得無所畏。能說一切可愛樂法。願一切衆生得諸菩薩極可愛樂甚深三昧。願一切衆生得諸菩薩甚可愛樂陀羅尼門。願一切衆生得諸菩薩甚可愛樂善觀察智。願一切衆生能現菩薩甚可愛樂自在神

通願一切衆生能於諸佛大衆會中說可愛樂甚深妙法。願一切衆生能以方便開示演說甚可愛樂差別之句。願一切衆生常能發起甚可愛樂平等大悲。願一切衆生念念發起甚可愛樂大菩提心常令諸根歡喜悅豫。願一切衆生能入一切甚可愛樂諸如來家。願一切衆生得可愛樂能調伏行。調伏衆生無有休息。願一切衆生得諸菩薩甚可愛樂無盡辨才演說諸法。願一切衆生於不可說不可說劫住於一切可愛樂世界教化衆生心無厭倦。願一切衆生以無量方便普能悟入甚可愛樂諸佛法門。願一切衆生得可愛樂無礙方便。知一切法無有根本。願一切衆生得可愛樂離貪欲際。知一切法畢竟無二。斷一切障。願一切衆生得可愛樂離貪欲際。知一切法平等真實。願一切衆生具足成滿一切菩薩甚可愛樂無戲論法。願一切衆生得金剛藏精進之心。成可愛樂一切智道。願一切衆生具可愛樂無礙善根。摧伏一切煩惱怨敵。願一切衆生得可愛樂一切智門。普於世間現成正覺。

疏四中初句總標。標將說別。上起行中云。以諸善根方便迴向。未知迴向。其相云何。故云爾時如是迴向。後所謂下別顯。顯如是言。三十一願。皆言令得可愛樂者。由見可愛樂境。起可愛樂善故。願成可愛樂德。釋此諸願。通有二意。一橫對上境。發等流願。二豎配地位。以彰總願。總者隨見一境。即多多願。該因果故。言橫對者。初之十願。對上國土。一若見國土。當願衆生。見法性土。二十之供具。三通受用變化淨土。餘皆土中之事。可以意得。對此一境。發十願者。以一例諸。皆應有多。不欲繁文。下漸從略。鈔三通受用者。但言清淨變化。亦有淨故。無諸煩惱。則是受用。既衆生往生。故皆通也。餘皆是土中之事者。四法即法門流布。五行即菩薩修行。六即天眼常喜。世界生者。天眼徹見十方。七則水鳥樹林花池寶

閣。八護法。九證法。十心無著。

疏次得無畏。下三願對上園林。無漏法林。無所畏故。總持三昧。爲園苑故。鈔無漏法林等。卽淨名佛道品。無漏法林樹。總持之園苑。下經三昧。爲園苑故。

疏次一願對上草木。善觀五乘。三草二木。智差別故。鈔對上草木者。三草二木。卽法華藥草喻品。初會已引。五乘差別。但由智異。故將善觀察智。以對草木。

疏次三對華神通等法。如華開敷。處衆開演。皆華敷故。果之一種。留在後明。

疏從發大悲。下一願以對一境。謂大悲熏心。以對上香。令根喜悅。如彼上服。生如來家。得珍寶分。以調伏行。爲聖財物。無礙辨說。爲莊嚴具。可樂世界。猶如於村。悟人多門。等彼城邑。無礙無本。如彼聚落。畢竟無二。若國無二王。證離欲際。方得自在。無戲論法。爲離誼雜。後三句。卽對前果。

疏二豎配地位者。文分爲二。前顯因圓。後三果滿。前中分三。初七未入法者。令得入法。卽是地前。一最初發心。同佛見理。二行法供養。此二十信。三生諸佛前。四解心見法。此二十住。五如說行。卽是十行。六同善友見。七觸境無違。此二十向。

疏二證得下十七願。已入法者。令得入地。初三初地。一證如理。二得教光。三成施行。次一二地行。不慮誤犯。故無所畏。愛語偏多。故能說法。次二三地行。習諸禪定。求多聞故。次有三願。如次三地。謂饑慧觀道品。難勝具神通。現前深般若。次方便下二願。七地行。謂方便偏多。故雖善修空無相。而慈悲不捨衆生。故云平等。大悲。次二八地行。謂諸佛勸起利他大心。無間現前。常悅豫故。得無生忍。眞生家故。次二

九地行。善知稠林。能調伏故。四、十無礙辨。善說法故。次二十地行。得入劫智。入微塵世界等。廣利樂故。能受如來大法雨故。

疏三有四願。已入地者。成普賢位。一、一切境中。得無礙見。覺法本源。無根本故。二、得無二住。斷二障故。三、住真實際。等如來故。四、得寂滅忍。無戲論故。疏第二三願。明果滿者。卽是三德。亦初金剛智而爲能斷。次離二礙。以爲所斷。此二爲無間道。後一解脫道。證成出現智周法界。故用前二釋。文旨有據。次第無差。金剛幢之巧談。非說者之穿鑿也。鈔第二三願者。能斷是般若。所斷是解脫。智周法界卽法身。取所證故。又初智德。次卽斷德。後卽恩德。恩德故能現世間。故涅槃三德釋中云。如來之身亦非涅槃通色身故。

佛子。菩薩摩訶薩。修習如是諸善根時。得智慧明。爲善知識之所攝受。如來慧日。明照其心。永滅癡冥。勤修正法。入諸智業。善學智地。流布善根。充滿法界。以智迴向。盡諸菩薩善根源底。以智深入。大方便海。成就無量廣大善根。

疏第五迴向成益中。先明得時。後得智下。正顯十句攝爲五對。一、以因感緣。由智內明。外爲友攝。二、以緣感因。外蒙慧照。內滅癡冥。此除障益。三、由勤修入三慧業。此明學益。四、上學證智。自善普充。此證入益。五、盡善福源。入實智海。此成二嚴益。卽爲向實際之本。以智窮入故。

佛子。菩薩摩訶薩。以此善根如是迴向。所謂不著世間。不取衆生。其心清淨。無所依止。正念諸法。離分別見。不捨一切佛自在慧。不違三世一切諸佛正迴向門。隨順一切平等正法。不壞如來真實之相。

疏第二離相迴向。卽向實際。此與前諸迴向小異。前多攝相歸性。少有依性起相。今此多顯性相無礙。以爲如相。故上諸標文皆躡前隨相之時。今不要對前以成無礙。故無時字。文分爲二。初直明迴向。後譬如下。對如廣辨。今初分二。初順如之行。二於諸佛法下。順如之益。前中亦二。先約心明。則止觀雙速。不著有無。後雖善下。別約行明。則權實雙行。不違性相。今初復二。一止寂妄取。不違體用。二等觀下。觀達空有。信智雙圓。前中初二句標。次其心下二句釋。上句無所取。故下句離能取。故不捨下明。其不違一不違因。二不違法。三不違果。所以不違者。不著無故。

等觀三世。無衆生相。善順佛道。善說於法。深了其義。入最勝地。悟真實法。智慧圓滿。信樂堅固。疏觀中初觀真空。善順下觀其妙有。

雖善修正業。而知業性空。了一切法。皆如幻化。知一切法。無有自性。觀一切義。及種種行。隨世言說。而無所著。除滅一切執著。因緣。知如實理。觀諸法性。皆悉寂滅。了一切法。同一實相。知諸法相。不相違背。與諸菩薩而共同止。修行其道。善攝衆生。入去來今一切菩薩迴向之門。

疏二權實雙行中。初句立宗。以無礙爲宗。次句同喻。如幻相有體卽虛。故後知一切下合。及出所因。一法無性。故二觀一切下。觀無著。故上二順於空。如三知如實下。知一實。故則順不空。如四知諸法下。結成無違。五與諸下。結成所作。謂能橫入一道。豎入一門。鈔初句立宗者。卽雖善修正業。而知業性空。量云。正業是有法。空有無礙。是宗法。因云。緣成卽無性。故同喻云。如幻。幻法從緣生。空有不相礙。正業從緣生。同彼幻法。不相礙。

於諸佛法。心無驚怖。以無量心。令諸衆生。普得清淨。於十方世界。不起執取我我所心。於諸世間。無所分別。於一切境界。不生染著。勤修一切出世間法。於諸世間。無取無依。於深妙道。正見牢固。離諸妄見。了真寶法。

疏二順如益中十句五對。令四心彌固。一、上安深法。下淨衆生。卽廣大心。二、我不生。世見斯絕。卽不顛倒心。三、於境無染。出世勤修。四、不依世間。正道唯固。上二卽第一心。無住涅槃爲第一故。五、妄見斯寂。了實體同。卽常心。常不捨離。同體悲故。鈔十句五對者。卽天親般若論中答住問也。若依無著卽當第一發心住處。然無著十八住處。住住皆答三問。三問卽應云何住。應云何修行。應云何降伏。秦經闕修行問。合在二中。言發心住處者。經佛告須菩提。菩薩應如是降伏其心。所有一切衆生之類。若卵生。若胎生。若濕生。若化生。若有色。若無色。若有想。若無想。若非有想。非無想。卽廣大心。我皆令入無餘涅槃。而滅度之。第一心也。如是滅度無量無數無邊衆生。實無衆生得滅度者。常心也。何以故。須菩提。若菩薩有我相。人相。衆生相。壽者相。卽非菩薩。不顛倒心也。論偈云。廣大第一常。其心不顛倒。利益深心住。此乘功德滿。此偈上半標四心。下半說住義。四心利益。具自他行。故此深心菩薩。應住大乘。功德盡圓滿矣。四心者。三界九類。皆盡度之。是廣大心。令人無餘涅槃。是第一心。二乘尙有三餘。非曰無餘。不名第一。今二種涅槃。無餘第一。四涅槃中。無住涅槃。方爲第一。今言無餘。卽佛無住。往昔但有二涅槃。故不言無餘耳。彼疏科上二心。名加行住。言常心者。論云。如是取衆生如我身。常不捨離。是名常心。偈中利益解其常義。謂度衆生常不離大悲同體如我之心。故名常矣。疏科此心爲修行定。言不顛倒。

心者。疏科爲折散心。言不顛倒者。論云。此示現離依止身。見衆生等相故。依身執我。名爲身見。有我等四。卽非菩薩。是名顛倒。今離此四。卽是菩薩。非顛倒心。大雲言。此文卽根本智。前文大悲。是後得智。由根本智。離我見故。前大智悲觀。無衆生相。始得成就。又大雲解實。無衆生得滅度者。總有五義。一。衆生性空。故無可滅。二。菩薩後得智。同體大悲。離自身外。無別衆生。卽無他體。於根本智。必先自離我見之相。卽自無體。旣無自他。實無衆生得滅度矣。三。一切衆生本來寂滅。不更滅故。四。順法性。法性無念。心若起念。卽違法性故。五。解法界。不度衆生。天親解云。平等眞法界。佛不度衆生。以衆生名。名卽法界。衆生陰身。陰卽法界。衆生與佛。同一法界。豈於此理度衆生哉。故淨名云。衆聖賢亦如也。至於彌勒。亦如也。若彌勒得授記者。一切衆生亦應授記。以同一如。不應別故。斯理特深。天親下文有此解者。謂教地上諸大菩薩。以初地上。盡證眞如。令地上學佛平等法界觀矣。而今天親卽解此文。大悲同體。是教地前學地上觀。故爲此釋。天親妙意。今日曉矣。釋曰。上皆暉公之意。今謂不然。且問寂滅與空。爲一爲異。若言一者。則初三不別。若言異者。異相云何。豈不詮言法性本空寂耶。又寂滅言。但是盡相。爲顯實耶。若是顯實。卽同第五同一法界。又同體悲。寧殊同一法界。又五法界與順法性。復何差別。非無念智。不名眞解。是知論明法界。生佛相望。論明同體。菩薩望生。故不應二。則上五解。唯應爲二。其無念義。應合在於不顛倒心。經唯舉我爲顛倒。法執不亡。豈非顛倒。故不顛倒。約止絕妄想。同體常心。觀冥眞理。是故經文。以不顛倒。釋上常心云。何以故。由無妄故。方能契實。由契理故。方得無妄。二義相成。故無衆生得滅度者。一契空如。性空寂滅。故無可度。二契不空。同一法性。法性平等。故無可度。足顯玄妙。皆就諸

佛菩薩觀心。非獨約理。故今疏文直取論意。便爲正解。復順今經。以今經證天親解經。妙符聖旨。疏第二對如廣辨如相迴向。生此段文。略以五門分別。一釋名。真謂真實。顯非虛妄。如謂如常。表無變易。此法相宗。若法性宗云。不變爲真。順緣曰如。由不變故。與有爲法。有非一義。由順緣故。與有爲法。有非異義。而起信云。無遣曰真。無立曰如。唯就遮詮。頓彰真理。鈔順緣曰如者。卽隨緣義。淨名云。法隨於如。無所隨故。今謂如隨於法。無能隨故。以如性空。方能隨緣。成一切故。而起信下。此論解釋分中。初釋真如門。正舉法體有二。一正顯如體。二會執釋名。初門論云。心真如者。卽是一法界大總相法門體。所謂心性不生不滅。一切諸法。唯依妄念而有差別。若離心念。則無一切境界之相。是故一切法從本以來。離言說相。離名字相。離心緣相。畢竟平等。無有變異。不可破壞。唯是一心。故名真如。釋曰。此上論文自有三段。一就實略標。二一切諸法下。會妄顯真。三是故下。結真離妄。此三皆是正顯如體。卽離妄僞爲真。離異相爲如。今疏所引。卽會執釋名。具足論云。以一切言說。假名無實。但隨妄念。不可得故。言真如者。亦無有相。謂言說之極。因言遣言。此真如體。亦無可遣。以一切法。悉皆真故。亦無可立。以一切法。皆同如故。當知一切法。不可說不可念。故名爲真如。釋曰。此上論文中。二先釋後。當知一切下。結前中分三。初三會執。恐有執言。上言離名字相。何故復立真如之名。故云。此真如名。亦是假說。二言說之極下。約名釋疑。疑云。若但假立。何故不立餘名。而立真如。釋云。真如者。言說之極。此後更無有名。故攝論中。謂真如爲究竟名。故云極耳。因言遣言。立此極名。若無此名。無以遣名。若存此名。亦不遣名。三此真如體。亦無可遣下。約相釋遣。古有多釋。今並不依。今謂此卽非安立真如。若安立說。遣妄曰真。顯

理爲如同唯識意。今正拂此二。無法非真。何有妄可遣耶。則真非真矣。無法不如。何有理可顯耶。故如非如矣。斯則無遺無立。爲非安立之真如矣。故疏結云。唯就遮詮。頓彰真理。

疏二明種類。或唯一味。無有差別。或分爲二。卽生空真如。法空真如。又安立非安立二。又空不空二。並如常釋。或分爲三。約三性辨。如瑜伽等。或分爲七。謂一流轉真如。卽諸行流轉實性。二實相真如。謂思惟諸法無二我性。三唯識真如。卽唯識性。四安立。五邪行。六清淨。七正行。上四卽如次四諦體性。如顯揚說。或分爲十。十地當明。或有百門。十無盡。如今經辨。則上來所列。皆是其中一義。設言通一切法。亦一義耳。鈔二明種類。總有六門。謂一、二、三、七、十及百。爲六類。一中有三。及六真如。并八真如。總有十義。餘如十藏。及前諸會已說。唯七真如。今當說之。卽顯揚論第三卷攝事品第一之三。論曰。真如作意相者。謂緣七種徧滿真如作意。廣說如經。一流轉真如作意。謂已見諦諸菩薩。以增上法行。善修治作意。於染淨法時。思惟諸行。無始時來。流轉實性。旣思惟已。離無因見。及不平等見。二實相真如作意。謂如前說。乃至於染淨法。因思惟諸法衆生無我性。及法無我性。旣思惟已。一切身見。及思惟分別衆相作意。不復現行。三唯識真如作意。謂如前說。乃至於染淨法所依。思惟諸法唯識之性。旣思惟已。如實了知。唯心染故衆生染。唯心淨故衆生淨。四安立真如作意。謂如前說。乃至於染淨法體。思惟苦諦。旣思惟已。欲令知故。爲有情說。五邪行真如作意。謂如前說。乃至染污法。因思惟集諦。欲令斷故。爲有情說。六清淨真如作意。謂如前說。乃至於清淨法體。思惟滅諦。旣思惟已。欲令證故。爲有情說。七正行真如作意。謂如前說。乃至於清淨行。思惟道諦。旣思惟已。欲令修故。爲有情說。釋曰。作意之義。卽菩薩

觀餘可知。疏但列名略囑而已。

疏三辨德用。一成依持用。與一切法而爲所依。此能持故。二成觀境。謂爲賢聖證觀境故。亦是百門之一德耳。起信說有三大。一者體大。謂真如平等。不增減故。二相大。謂具足無量性功德故。三用大。能成一切世間出世間善因果故。然彼依心說於三大。真如乃是其一。以一統二。二皆屬如。然違真名惡契。如則滅。順真爲善。稱如則大。約善順義。故說如爲善因。然違順雖殊。離如則無可違。故惡亦以如爲體。若會此經百門之內。或體或相。或用或兼。實則一一皆通體等。故爲百門融通理事。使重重無盡。猶如帝網。鈔一成依持用者。卽唯識論真如爲迷悟依。如四轉依義中廣辨十地再辨起信等者。疏文有四。一引論三大。全是論文。而體大中一者體大。下欠一切法言耳。斯卽立義分中。彼疏釋體云。真性深廣。而凡聖染淨。皆以爲依。故受大名。隨流加染而不增。反流除染而不減。又反流加淨而不增。隨流闕淨而不減。良以染淨之所不虧。始終之所不易。故云平等不增減也。二相大論云。謂如來藏具足無量性功德故。疏釋云。二種藏中不空如來藏也。今疏略無如來藏言。但約真如以說相故。謂不異體之德。故云性功德也。如水八德不異於水。三用大。全同彼疏釋云。謂隨淨業。約自然大用。報化二身。麤細之用。令諸衆生。始成世善。終成出世善故。彼論下文具顯用相。然彼依心下。第二對會今經。亦是解妨。妨云。彼論於依一心法而立三大。真如乃是其一。何得真如具三大耶。故彼立義分中云。摩訶衍者。總說有二種。一者法。二者義。所言法者。謂衆生心。是心則攝一切世間出世間法。依於此心。顯是摩訶衍義。所言義者。則有三種。一者體大等。通局旣異。何得引耶。故下通云。以一統二。二皆屬如。故下解釋分中。

分爲三門。眞如卽是一法界大總相法門體。又此二門不相離故。故如必有相用二也。然違眞下三釋用大義似太局。亦名解妨。妨云。眞如旣爲一切法體。隨流成法。何得不言能生惡因果耶。故爲此通。是以璣經云。始起一想。住於緣順。第一義諦。名之爲善。背第一義諦。名之爲惡。約違義邊。不言生惡。於中先明不言生惡。所以然。違順雖殊。下釋爲惡體。藏和尚云。以違眞故。不得離眞。以違眞故。非其用也。故今疏云。離如則無可違。故不離也。如波違水。離水無波。若會此經下第四會釋經文具闕。至下當知疏四約教不同。可以思準。鈔四約教不同者。小乘但有生空。始教卽立二空。及六七等。不卽於事終教。卽卽事卽如頓教。多用非安立義。圓教卽是百門。重重無盡。

疏五釋文者。然此百門。古釋非一。一英法師十分之。如次配於十位中。如一賢首位。二十住。三十行。四十向。五淨心地。六行迹地。七決定地。八究竟地。九等覺地。十佛地。更有諸德。各分十門。賢首並皆不許。遠公分三。初十配地。前次八十八句配地上。後二句佛地中。如理皆難通。佛地何以無前如德。如第二門眞實爲性。何以不得通於諸位。若取隨位之德。以立如名。如十地十如。理則可通。然又不出其相。實則百門之德。必貫之一。如能如之德。豈無異相。異相難見。且從不分。分亦無過。故末句云。究竟清淨。義同於果。鈔理皆難通下。二辨順違。於中二意。初奪分者。次若取下。縱成分義。責不出相貌。後實則縱成二義。

疏今且十十科之。以配十地十如。鈔今且十十下。三申今正解。上辨順違。二皆有理。後有究竟。分則理長。

疏初徧一切及無相爲相等。卽徧滿眞如之義。鈔初徧一切下。別顯卽爲十段。依唯識第九。前雖隨地別釋。今爲對文類例併舉。今初徧一切處。及無相爲相。卽徧滿眞如。謂此眞如二空所顯。無有一法而不在故。世親釋云。謂此法界徧一切行。以無少法非無我故。今言二空。無有一法非二空故。今疏云。徧滿一切。徧滿義彰。無相爲相。卽二空相。

疏二中無能測量。無有比對。卽最勝義。鈔二中等者。唯識釋最勝眞如云。謂此眞如。具無邊德。於一切法。最爲勝故。注云。由能離犯戒垢。證此眞如。德莊嚴故。今無測無對。卽最勝義。

疏三中於法無礙。爲衆法眼。卽勝流義。鈔三中下。論釋勝流眞如云。謂此眞如所流教法。於餘教法。最爲勝故。注由得三慧照大乘。法觀此法教根本眞如。名勝流眞如。或證此如。說法勝故。今云於法無礙。卽教法等。爲衆法眼。亦勝流矣。

疏四中無著無住等。卽無攝受義。鈔四中等者。論云。四無攝受眞如。謂此眞如。無所繫屬。非我執等所依取故。世親解云。於此如中。無計我所。無攝我所。如北洲人。無繫屬故。應說此如。非我執我慢我愛。無明邊見我所見等。所依取故。今無著無住。卽無攝受。

疏五中畢竟無盡。無有變易。卽類無別義。鈔五中下。論云。五類無別眞如。謂此眞如。類無差別。非如眼等類有異故。注謂生死涅槃二皆平等。故無差別。今竟無盡變。豈有別耶。

疏六中無有分別體性。無生卽無染淨義。鈔六中下。論云。六無染淨眞如。謂此眞如。本性無染。亦不可說後方淨故。中邊釋云。由六地觀十二因緣。知緣起法。無染無淨。非謂如也。由眞如故。法無染淨。名

此真如爲無染淨。今無分別。何有染淨。

疏七中無所不在。住有無法。卽法無別義。鈔七中下論云。七法無別真如。謂此真如。雖多教法種種安立。而無異故。注雖諸教法。依如建立。如無異故。今無所不在。何有別耶。有無同如。法豈別耶。

疏八中體性清淨。體性平等。卽不增減義。鈔八中下論云。八不增減真如。謂此真如。離增減執。不染淨有增減故。卽此亦名相土自在。所依真如。謂若證得此真如已。現相現土。俱自在故。注謂凡位不減。聖位不增。故今清淨平等。豈有增減。

疏九中徧一切法。是佛境界。卽智自在義。鈔九中下論云。九智自在真如。謂若證得此真如已。於無礙解。得自在故。注謂此地中。得無礙解。名智自在。今徧一切。智何不知。是佛境界。真自在也。

疏十中住一切地。成就一切諸佛菩薩等。卽業自在義。其中餘義。可以類取。鈔十中下論云。十業自在真如。謂若證得此真如已。普於一切神通作業。總持定門。皆自在故。今住一切地。成佛菩薩。業自在矣。然此十如。約詮辨體。若不爾者。且如非先不徧。今者方徧。若不約詮說徧何法。上來略取文中各有二義。以成其名。餘各八義。取類本名。可以意得。

疏隨地別顯。唯說十如。一具一切。十成百。欲顯如德。無量無邊。鈔隨地別顯下。第二解妨。總有四妨。第一百不同妨。謂有妨云。彼唯十如。此中說百。何要將百以同十耶。故疏釋云。爲順十地。且說十如。理實真如。具無盡德。十融攝。且說百門。百十皆是一周圓數。順無盡耳。

疏地前通修等覺徧等。如來窮證。鈔地前通修者。第二通前後無如妨。妨云。將百門如。配十地如。地

前等妙應無如矣。故爲通云。地前通修十如。等覺徧等十如。妙覺窮證十如。但同地如。無不同矣。疏然異從義別。體本常融。但契一如。自含衆德。非由作意。順差別如。能通迴向。亦融攝無礙。鈔然異從下。第三通如。觀難成妨。妨云。十地菩薩。一地之內。唯觀一如。加行既成。方證其一。今羅百數。成觀何由。况一味之如何。由契合。故今答云。約行布說。別證十如。就圓融修。一含衆妙。加行有異。說十不同。正證相應。本唯一味。隨門入理。略有百門。若契一門。自含衆妙。如海一滴。味具百川。牽衣一角。全體來矣。故唯識云。雖真如性體無差別。而隨勝德。假立十種。十既假立。百門亦然。德用多門。非體不一。言能同迴向者。由如融攝。行順於如。亦融攝矣。故初地中。徧達十如。隨能證行。後後建立。

疏稱如起行體。卽是如。但人信如德。尙迷迴向。故以如德。喻迴向德。若取文義。使者應云。真如體相。徧一切處。善根迴向。以同如故。亦徧一切。無邊際等。又徧一切。方得同如。鈔稱如起行下。第四通迴向。非如妨。妨云。夫如普徧。無法非如。何有外別。有迴向以爲所喻。通意有二。一以其所信。喻所不信。二若取文義。下立爲體式。則無前難。

疏百門之內。各有二句。上卽所同之如德。下善根下。能同迴向之德。鈔百門之內下。第三釋文。於中有二。先總。

